

鄉土志業編

張國淦著




九

30  
2



始





華州鄉土志目錄

中憲大夫四品銜候補直隸州知州陝西同州府華州知州調署長安縣知縣褚成昌敬述

政績	一
兵事	七
耆舊	一二
戶口	四七
人類	四八
宗教	四八
實業	四八
地理	四八
物產	六一
商務	六三

燕京大學圖書館寄贈本



華州鄉土志

目錄

燕京大學圖書館



華州鄉土志

政績

周

姬友厲王少子封鄭地幽王八年為周司徒國語謂公得周眾及東土之民又武  
公時以緇衣頌賢詩註有緇思桓公意是公之賢有裨於民而民德之也後殉驪  
山之難諡曰桓祀名宦鄉賢忠孝祠

北魏

席法友安定人以淮南剋定遷華州刺史廉能有德父老至今稱之卒諡襄祀名  
宦祠

裴宣明聞喜人太和中為華州刺史多善政卒諡簡祀名宦祠

李叔彪渤海人太和中假節行華州事為吏人所畏服卒諡穆祀名宦祠

西魏





楊儉字景則華陰人爲華州刺史政尙寬惠卒諡曰靜

北周

達震代人明帝初除華州刺史導民訓俗頗有治才秩滿還朝爲百姓所戀祀名宦祠

王罷京兆人質直木彊處物平當仕周爲大都督鎮華州強鄰不敢犯境

韓果武川人天和初授華州刺史爲政寬簡吏民稱之祀名宦祠

楊纂廣甯人天和中爲華州刺史蒞職但推誠信百姓懷之祀名宦祠

唐

陸贄字敬輿爲鄭縣尉克勤厥職聲稱爛然祀名宦祠

樊忱開元中爲華州刺史復鑿敷水渠以通渭漕民甚便之

劉晏字士安爲華州刺史寬猛相濟吏民安其政

盧鈞字本和范陽人爲華州刺史潼關防禦鎮國軍等使爲政廉潔關輔驛馬疲

耗公市健馬三歲一易自是無乏事祀名宦祠

杜甫字子美京兆人爲華州司功有爲郭使君准滅殘寇形勢狀又有秋策進士

文常愬鄭縣亭子有石刻詩傳世後去官郡民爲立生祠祀名宦祠

後晉

楊彥詢寶鼎人天福七年徙鎮國軍節度使時大饑公爲政愛民民賴以蘇

宋

范祥字晉公三水人歷知慶邠華三州刺史建議變鹽法後人不敢異議

崔輔爲華州知州毀韓建祠及碑營郭汾陽王廟於州城之東北隅歲時致祭祀

名宦祠

元

呂戴河內人爲華州知州勸農興學俱有成效及代民爭留之祀名宦祠

明

伍性榮縣人爲華州知州資稟明達遇事迎刃立決郡中翕然稱治又纂修華州

舊志



桑溥字汝公濮州人爲華州知州勸善懲惡民翕然不變州城北積水萬頃公導之入渭又數擒虎以淨山峪民甚德之祀名宦祠

國朝

謝白生河陽人康熙四十四年蒞任時值構峪與方山河大水爲災二華之民互相爭訟公詳請巡撫鄂公相度地勢高下疏濬渠堰其汗下者俾民溉種稻田由是民訟息而賴以殷富

席紹葆吳縣人嘗於舊廢考院改建秀峰書院稽查官地百餘畝以充師生修膳乾隆二十五年河水爲患公勸諭近河居民疏通河道建閘修隄水患大息

汪以誠江南江甯人居心慈惠蒞任數載審訊未用酷刑而悉得情實歲旱祈雨誠敬感格甘霖立降治城舊多圯缺以誠捐俸修葺之乾隆甲辰丁未大水加意賑恤災民得慶更生州志自康熙甲子百餘年來事跡闕如延郡紳史尊續修刊行

萬家霖浙江山陰人同治三年蒞任慈惠愛民兵燹後招集流亡勸墾田畝俾民

復業念劫後瘡痍未復多方撫字不忍以追呼累民屢經大府嚴檄催解繼以呵斥弗顧也竟坐催科不力罷譴民頌其德

王贊襄甘肅中衛人同治五年蒞任勤政好士嘗捐廉千緡備諸生膏火時賊氛未靖舊城不足資捍衛乃於東南隅築新城守禦居民賴之

吳炳南河南南召人政事之暇慨念百餘年來州志未修延請州紳有學行者數人纂修自乾隆中至光緒八年舉凡官師人物之盛治亂變遷之迹風俗藝文之舊一一詳述瞭如指掌兵燹後初志續志三志片板無存炳南命州人士廣爲搜求重加考校悉付梓行世

李嘉績四川成都人光緒二十六年署任甫下車即捐廉購書數百種以惠士林時值大荒倉儲匱乏民捐不繼嘉績請於上官力求巨款民食賴以無闕 以上與利

周

鄭子握突桓公子犬戎弑幽王於驪山公與晉文侯衛武公秦襄公俱以兵會立



太子宜白

西魏

宇文導字菩薩太祖東征以公爲大都督華東雍二州諸軍事行華州刺史治民訓俗得捍禦之方

宇文深字奴千爲東雍州刺史爲政嚴明示民以信豪右不得肆其奸

北周

鄭偉除華州刺史政尙威猛吏人莫敢犯禁盜賊屏息祀名宦祠

崔宏度字摩訶衍安平人爲華州刺史御史嚴急令行禁止盜賊屏息祀名宦祠

唐

高郢字公楚爲華州刺史政尙仁靜初李元亮自華引軍戍良原元亮卒軍入神策州仍歲餉其糧民困輸入至是公奏罷之祀名宦祠

李景讓字後已爲華州刺史清虛寡欲門無雜賓而公於州事無不治祀名宦祠  
唐後

王易簡字國寶授華州幕僚朱友謙叛攻華州詣華帥李保衡請築月城版築始畢外城果壞軍民賴之

宋

吳時邛州人知華州鄭縣轉運使檄州運米五萬輸長安鄭獨當三萬公貽書使者移兵於華就食以免車乘夫役之費使者從之祀名宦祠

張甫爲華州推官日用倉粟惡吏當追賠錢數百萬轉運使李紘以吏屬公乃令斗米春之可棄者十之二三又試亦然吏得弛繫所賠錢纔數十萬而已紘因薦

公遷職

金

沃側宗室麻吉子爲華州防禦使秦饑盜賊充斥公募兵討平之

明

楊綵字質甫京衛人爲華州知州臨政果決民不敢犯法乙卯地震民將遽起掠食公諭以朝廷無恙不可叛逆復勸借富家粟以賑民民素服公之德又得粟卒



無一敢犯令者

范賡山東人爲華州知州鋤強除惡不畏權要以實心愛民聲名藉甚民爲立生祠

國朝

王廷用奉天遼陽人蒞政有膽略剛明果決順治二年大亂甫定民役未均差糧煩苦廷用申請台司清釐闔州糧石每里定爲十甲每甲定差糧五十三石有奇通融均平百姓稱便

秦宗堯奉天義州人順治六年百姓甫離兵燹下車卽謁文廟葺廊廡作木主定廟祭未月餘忽山右告急一時解火器運鎰重民力苦不支宗堯西迎轉運使於渭上力白從渭北渡便華民賴以不擾廉約寬平民感其德於東西郊兩建生祠云

顧培元奉天遼陽人性仁厚椎魯少文毫無宦氣爲政一年嚴革銷算臥批私派之弊立石垂後

胡有德奉天鐵嶺人性仁慈剪惡除害頗明斷順治甲午五月州境旱屢禱弗應乃製文乞禱於太白山出行炎日中終日不息天乃雨秋禾大成

李文盛奉天遼陽人爲政寬慈清儉順治丙申歲大水河堤潰決淹沒民田數千頃公冒雨率夫萬餘沿河補築住宿河干經旬不返其勤於民事皆此類

馮昌奕山西蒲坂人甫蒞任覩明倫堂傾圮輒捐俸膳完大興學校定季攷督月課文風丕變華驛當關西首衝供應芻蕘里民不勝其苦華有里差久滋煩擾公惻然曰民力幾何堪此侵漁毅然撤之歲值編審戶口逃亡甚衆致令丁徭重疊乃一一綜核應豁免者應成丁者名實咸副丁糧封納之數華無花名赤歷久爲蠹書中飽公列款上聞更造花名赤歷夙弊盡剔

王杏舒安徽合肥人輕徭役平收倉糧嘗曰一方之蠹民不去則一方之良民爲蠹所蝕矣所至必訪求積惡盡法懲之

李雙帶山東海豐人先是州設鄉頭支各里差因按糧攤費得從中舞弊自乾隆五十九年十月至次年正月闔州共派銀二萬二千五百餘兩雙帶悉心剔釐裁



華州雜志 五  
冗費嚴銷算斥革鄉頭別舉里長由是積弊一清

周蕃壽四川涪州人咸豐二年署任華州才具優長聽訟明決時髮逆竄擾河南兵差絡繹里局車馬不敷用蕃壽設法支應兵勇不敢勒索里民戴之立德政碑以誌遺愛云

汪炳煦山東濟甯人光緒三年歲大飢公稟請開倉賑卹自倡捐千緡並勸富紳捐以圖接濟土著則計口授糧流氓則開廠給粥前後拯活災黎不下三萬口四年春公步禱得雨秋蝗不入境由是歲漸稔而公憫民困未蘇請於上官裁減差徭歲省錢二萬餘緡餘若設義塾增膏火定課程嘉惠士林不一而足士民感戴爲立德政碑

余麟書湖北漢陽人慈祥豈弟不事追呼及上官嚴催輒負債先爲百姓墊納石隄河紆曲多灣每經山水暴發輒沖決公督催民夫改修新隄嘗黎明先民夫至民感其勤愈踊躍羅紋河下流壅塞爲患公相其地勢須從胡村開渠入渭尾閘乃通而胡村係大荔縣地其官民俱不允太守亦不爲力事未就適公去後任趙

公鑑爭於台司卒如公議論者謂余啓其緒趙竟其功云

李端榘貴州貴筑人先是華州刀匪風熾大爲民害公下車威厲風行匪類斂跡民賴以安以上去害

晉

杜畿杜陵人守鄭縣繫囚數百盡決遣之囹圄一空

唐

崔隱甫武城人爲華州刺史吏民畏愛庭無滯訟祀名宦祠

袁滋字德深蔡州人政清簡專尙慈惠有犯令者時時法外縱舍祀名宦祠

崔戎字可大爲華州刺史以故事置錢萬緡爲刺史私用公不取及去召吏曰藉所置錢享軍民有兄弟分析不均者訟於州公曰咎在我乃垂泣自責兄弟感悟終其身不復析居祀名宦祠

宋

趙剛爲華州知州治民以安靖爲本催科理訟不嚴而理祀各宦祠



明

楊勝賢閩中人為華州知州蒞政嚴明獄無繫囚

陳仲秩巴縣人為華州知州蒞政精明尤多仁恕以去皮木杖杖人止於示辱而已然一時民歸心焉祀名宦祠

江珏金谿人為華州知州明敏之才優於聽斷

甘為霖字公璋為華州知州清廉蒞政獄無繫囚祀名宦祠

高崇字企之為華州知州練達政事無巨細必按以法

陳應麟字仁甫為華州知州以實心教養民催科立限民應之反過於施刑罰者

張孟容字大卿為華州知州勸民為善凡民訟受之以待悔悟不可已者然後刑之

汪學海甯國人為華州知州慈明仁恕廉靖寬平里人有先判保甯者為悍僕誣麗於辟公力出之無左右顧

王標字的明太原人為華州知州風厲超羣有能吏聲公頒行印票裁革佐貳受

詞又革去什排民皆踊躍封納至今猶懷其德云

國朝

王潞浙江餘杭人康熙元年蒞華剔奸釐弊治劇理煩案無滯牘民無疑獄嘗有盜越獄制撫上其事命公緝捕歷年餘獻囚獻馘制撫嘉其功因加一級以上聽證

兵事

周

武王三十三年己卯春伐紂紂三十三年告太平於告平城東蔭商廳略續志告平城今

州東二十里柳子鎮南隴

襄王三十三年壬寅夏四月秦康公二年伐晉靈公二年取武城左傳武城即武平

城在今州西十七里水經注鄭東有告平城西有武平城後名桓城又名光武城今名三峽店

靈王十三年壬戌晉悼公十四年率諸侯大夫伐秦景公十八年敗械林史記十二諸

侯年表通志械林在州東北二十五里



貞定王十三年甲申晉 哀公元年 取秦 厲公二十一年 武城 方城紀要

威烈王十三年戊辰秦 簡公二年 與晉 魏文侯十二年 戰敗於鄭下 史記六國年表鄭

下即鄭城

威烈王十八年癸酉魏 文侯十七年 伐秦 簡公七年 至鄭城而還 六國年表陝西通志

鄭城在今州東北二十里鄭始封邑也平王東遷宿此因名王宿莊暨踐祚封庶子於此賜姓宜後周時

移鄭城於西南九里即今州東北之時村

安王十二年乙未秦 惠公十年 與晉 魏文侯三十五年 戰武城縣陝 六國年表

安王十五年戊戌魏 文侯三十八年 伐秦 惠公十三年 敗師武下 方輿紀要即武城下

顯王十九年癸亥秦 孝公十二年 魏 惠王二十一年 遇於彤 六國年表地理今釋彤在華州

西南

赧王四十年丙戌秦 昭王三十二年 使白起擊魏 安釐王二年 軍於華 戰國策

漢

光武帝建武元年己酉赤眉樊崇西向長安道經鄭地於鄭北設壇場探符立劉

盆子 資治通鑑 地理今釋鄭今華州

光武帝建武八年壬辰帝自將西征隗囂駐武平城 見前武城注

晉

惠帝泰安二年癸亥河間王容舉兵反頓軍於鄭縣之高平亭 晉書劉沈傳 東海

王越遣都護麋晃率國兵伐容至鄭容將牽秀拒晃晃斬秀并其二子 晉書本傳

鄭縣在今州西南二十五里舊志載在今小漲村西北唐武德四年自西一里舊州城移建於此南有車

徒寺初為韓建家佛堂此即韓建為節度使之華州也今州治在唐時為天子行宮 續志高平亭在今

華陰敷水鎮

穆帝永和六年庚戌冬十一月符健入秦據赤城以抗杜洪 方輿紀要赤城在州城西

即辯城故潘邑殷契所居也 晉書本傳作次赤水

孝武帝太元九年甲申慕容冲自華陰進向長安秦符堅 堅建元二十年 使符暉拒

之戰於鄭西暉大敗 晉書載記 鄭西鄭縣之西

孝武帝太元十五年庚寅七月馮翊郭質起兵廣鄉移檄三輔討姚萇鄭縣苟曜



不從質伐曜為曜所敗又戰於鄭東衆皆潰散晉書載記 廣鄉州西南六十里廣鄉原地  
安帝義熙十三年丁巳劉裕伐秦至潼關秦主姚泓泓永和二年遣姚讚拒裕於  
關西姚難屯香城裕遣王鎮惡王敬自秋社西渡渭破難軍難退涇上讚遂退屯  
鄭城裕尋進據鄭城晉書載記

南北朝

梁武帝中大通二年魏敬宗永安三年 庚子三月万俟醜奴侵擾關中魏爾朱榮遣爾朱  
天光討之時赤水蜀賊斷路天光遣賀拔岳破之遂進平醜奴資治通鑑 赤水在今  
州西二十七里

梁武帝大同元年 魏文帝大統元年 東魏孝靜帝天平二年 乙卯王羆為華州刺史東魏  
高歡率軍至潼關人懷危懼勸勵將士衆乃安羆修州城未畢梯在城外高歡  
遣韓軌司馬子如從蒲津宵濟襲羆羆不覺比曉軌衆已乘梯而入羆尙臥未起  
聞關外洶洶有聲便袒身露髻徒跣持白挺大呼而出謂曰老羆當道臥貉子那  
得過敵見驚退逐之東門左右稍集合戰破之軌遁去周書本傳

唐

代宗永泰元年乙巳同華節度使周智光征吐蕃至鄜州阮鄜防節度使杜冕家  
屬八十一人殺鄜州刺史張麟詣闕獻捷上未治其專殺罪遣歸鎮智光至華州  
益驕橫上既悔召之不至大歷二年丁未春正月丁巳密召郭子儀討智光子儀  
大將渾瑊李懷光軍於渭上智光麾下聞之皆有離心己未智光大將李漢惠自  
同州帥所部降於子儀壬戌貶智光澧州刺史甲子華州牙將姚懷李延俊殺智  
光以其首來獻淮西節度使李忠臣入朝以收華州為名帥所部兵大掠自潼關  
至赤水二百里間財畜殆盡官吏有衣紙或數日不食者資治通鑑  
德宗建中四年癸亥十月上如奉天賊朱泚據長安遣將何望之襲華州潼關守  
將李元亮引兵破之唐書本傳

僖宗廣明元年庚子十二月黃巢陷華州留其將喬鈴守之中和二年壬寅九月  
丙戌巢所署同州防禦使朱溫殺其監軍嚴實舉州降王重榮李詳亦欲歸之為  
監軍所告巢殺之以其弟思鄴為華州刺史十一月李詳舊將共逐黃思鄴推華



陰鎮使王遇爲主以華州降王重榮王鐸承制以王遇爲刺史三年癸卯二月壬子巢將王蟠黃揆襲華州據之王遇亡去甲子李克用進圍華州黃思鄴黃揆攖城固守克用分騎屯渭北三月癸巳克用等拔華州黃揆棄城走通鑑記事本末

昭宗乾甯二年乙卯李克用攻華州韓建登城呼曰僕於李公未嘗失禮何爲見攻克用使謂之曰公爲人臣偏逐天子公爲有禮孰爲無禮者乎通鑑輯覽

乾甯三年丙辰七月李茂貞犯闕帝如華州四年丁巳八月韓建殺通王滋等十人於石隄峪光化元年戊午六月己亥帝幸西溪觀競渡八月車駕至長安通

鑑輯覽 石隄峪在今州西南十二里西溪觀在今州西南七里

昭宗天復元年辛酉十一月帝如鳳翔朱全忠遣司州馬鄴取華州謂韓建曰公不早知過自歸又煩此軍少留城下矣是日全忠自故市引兵南渡渭韓建遣節度副使李巨川請降獻銀三萬兩助軍全忠乃赴赤水尋至零口西聞車駕西幸復引兵還赤水丁巳以建爲忠武節度使以前商州刺史李存權知華州車駕之在華州也商賈輻輳韓建重征之二年得錢九百萬緡至是全忠盡取之建又使

王溥至赤水見全忠計事全忠復書曰進則懼挾君之謗退則懷負國之慚然不敢不勉戊午全忠發赤水戊戌令崔胤帥百官及京城居民悉遷於華州通鑑紀事本末

天復三年癸亥春正月全忠圍帝於鳳翔韓全誨以詔書徵藩鎮入援平盧節度使王師範遣張居厚以壯士二百爲輿夫伏兵輿中西馳梁軍稱師範使者聘梁謀誅全忠居厚至華州東城華州將婁敬思疑其有異剖輿見兵居厚遂殺敬思以兵攻西城不克而還五代史王師範傳 東城即鄭縣城西城即廢華州城

五代

梁朱晃開平三年己巳太尉劉知俊功名浸盛以梁主猜忌日甚內不自安六月遂以同州附於岐遣兵襲華州通鑑輯覽

梁朱瑱貞明六年庚辰朱友謙以同州降晉梁主遣劉鄩圍之晉將李存審等馳救鄩敗退保羅文寨存審分兵攻華州克其外城方輿紀要 羅文今州東十里

後唐閔帝應順元年甲午二月庚寅潞王從珂反鳳翔唐主遣招討副使藥彥稠



等會諸鎮兵討之三月丙辰戰敗走諸鎮兵叛降潞王甲子彥稠復戰潞王於華州被執囚於獄已而殺之 五代史

宋

高宗建炎元年丁未 金主晟天會五年 十二月金將洛索自韓城履冰渡河破同華州 通鑑輯覽 二年戊申 天會六年 八月洛索敗宋兵於華州 金史紀事本末

紹興十一年辛酉 金主豐統元年 九月宋將吳璘遣郭浩復華州 通鑑輯覽

紹興三十二年壬午 金主雍大定二年 金押軍萬戶費摩阿拉 原作斐滿授刺 明安

伊喇薩爾拉 原作移刺沙里 敗宋兵於華州 金史紀事本末

甯宗嘉定十五年壬午 金主珣元光元年 夏六月紅襖賊于忙兒擾柳子鎮驅掠人

畜提控張瑀追擊奪還 金史紀事本末

元

順帝至正十七年丁酉二月韓林兒黨李武崔德分掠同華諸州尋為察罕特穆爾與李思齊連兵擊敗之 通鑑輯覽

至正二十八年戊申五月李思齊張良弼合兵駐潼關以拒明師明都督馮勝陷之乘勝遂取華州 名山藏

明

太祖洪武二年己酉三月常遇春遣千戶姚應卜百戶馬安勦石隄山寇平之先是元末十大盜據棗園坪險隘立寨稱號五年元軍屢勦未平姚馬二將引兵夾山奮戰羣盜敗散 初志 棗園坪在石隄峪內三十里

莊烈帝崇禎七年甲戌流寇千人盤踞石隄山峪屠邑略地八月巡按傅永純入關諭甯夏守備薛國蕙華州州判劉命新等勦之初八日戰於柿村互有傷亡卽夕遁去 續志 石隄在州西南六十里柿村在州西南五十五里

崇禎八年乙亥九月洪承疇追李自成於渭南大破之自成東犯華州高迎祥亦屢敗東逾華陰南原絕嶺與自成偕出朱陽關 在陝州盧氏縣西 與獻忠合 通鑑輯覽

崇禎八年十一月辛酉秦賊一字王等部衆二十萬撞天王統十七萬犯華州出



潼關 明史紀事本末

崇禎九年丙子正月李自成黨掠華州西南原人畜男婦死者頗衆 續志

崇禎十六年癸未十月壬戌李自成僞將一隻虎李過陷閿鄉獲督師大纛以給守關者乘間突入潼關陷自成間道緣山崖出潼關後夾攻官軍大潰賊既入關而行一隻虎陷華陰孫傳庭及白廣恩退屯渭南賊陷華州 明史紀事本末

國朝

順治元年甲申八月杆賊盤踞石脆山掠人行路斷絕七年庚寅知州秦宗堯率民兵勦撫失利九年壬辰提督府大庭王應龍討平之 續志

嘉慶三年戊子三月教匪齊繩奔妓王氏自灌峪出擾石脆山麓等村經旬大兵至賊入竹峪越嶺南奔 三續志 灌峪州西南六十里 竹峪州西南七十里

同治元年壬戌四月己卯粵寇僞扶王陳德才僞端王藍成春陷華州把總郭大鵬死之初賊由鄂入陝出澇峪四月乙亥陷渭南知州濮垚等率兵勇民團禦於赤水鎮擊退之繼而賊繙擁至官兵敗績大鵬戰歿州城陷金城古城崖破等砦

鄉民禦賊賊屠其城 三續志 金城州西十七里 古城州舊城西南隅 崖坡州西一里

同治元年五月庚寅渭北逆回渡渭犯華州焚殺一空先是倉渡孝義等處逆回蠢動知州濮垚率民團扼守渭水旬餘賊未南渡五月庚寅北風大作團民鎗礮難施賊涉渡水及馬腹蠶擁登岸大肆焚劫八月癸亥勝保兵隊西行遇賊赤水鎮官軍敗績賊益橫秋冬屢犯高塘等原焚殺甚慘 三續志 高塘州西南五十里

同治五年丙寅十月辛卯捻匪僞燕王張總愚由華陰犯華州遇官軍於白泉鋪賊敗尋東去十一月癸亥賊復犯華州官軍戰於三峽店失利退守郭村賊悉屯大漲小漲赤水明日西去 三續志 白泉鋪州西二十里鄭縣北三峽店見前武城注郭村州西二十五里即後魏東雍州西魏華州一名廢華州大漲州西北三十里小漲州西北二十五里

同治六年丁卯六月壬辰捻回合股自渭南白王村渡渭犯華州火新建大堂掠財畜次日引去 三續志

同治九年庚午正月逆回擾渭北屢欲南渡水師統領黃本富偕民團力禦乃去 三續志



光緒二十六年庚子八月己亥渭南會匪田貴濱反閏八月庚子犯高塘鎮民團擊潰之擒貴濱黨三十名傳解渭南庚申正法八名餘遣歸田里

者舊

唐

郭子儀華州鄭縣人體貌奇偉少以武舉異等補左衛長史累遷單于副都護振遠軍使安史逆命充朔方節度使東收雲中諸郡引軍下井陘方北圖范陽詔班師赴行在子儀至行在即帥師平河曲攻潼關由是關陝始通從廣平王俶率番漢兵五十萬收長安東討安慶緒遂取東都入朝肅宗遣使迎灞上勞之曰國家再造卿之力也河東軍亂詔進封汾陽郡王移屯絳州子儀至屯誅首惡王元振等數十人亂黨悉平諸鎮皆惕息代宗立程元振百計離構因罷兵柄既而代宗悔悟甚禮重之元振懼說帝都洛陽子儀條陳多方乘輿始還尋加太尉吐番入寇詔赴涇陽子儀結回紇破吐番十萬之師威振華夷雖不預朝政而以一身係唐室安危者二十餘年秦漢以來勳業之隆所未有也德宗嗣位詔攝冢宰賜號

尙父進位太尉中書令年八十五薨子姓皆顯宦富貴壽考唐代一人而已贈太師諡曰忠武

郭曖子儀第六子尙昇平公主朱泚之亂不知車駕幸奉天爲賊所逼欲授僞官曖辭居喪被疾旣而與兄晞弟曙及公主奔奉天德宗喜復初官卒贈尙書左僕射

郭縱曖次子尙漢陽公主穆宗卽位累遷工部尙書兼太子詹事充閑廡宮苑使尊榮貴顯三十餘年近無與比而縱恭遜虔恪不以當貴驕人士無賢不肖接之以禮卒贈尙書左僕射

郭承嘏字復卿子儀曾孫元和四年進士累遷起居舍人丁內艱以孝聞太和六年拜諫議大夫文宗以鄭注爲太僕卿承嘏極論其非注畏而惡之時江淮旱用度不支詔宰相分領戶部嘏以宰相不侵庶司不宜兼領此職文宗納其言而止方欲大用會卒家無餘貲僚友爲賻其喪始克成禮贈更部尙書以上名宦

王海賓鄭縣人開元初爲豐安軍使二年吐番寇隴右詔防禦使薛訥率師禦之



以海賓爲先鋒戰於武街乘勝進戰長城堡諸將媚其功按兵願望海賓戰死大軍乘之斬賊首萬七千級元宗閱其忠贈金吾大將軍

王忠嗣海賓之子父戰死時忠嗣方九歲始名訓元宗賜名忠嗣養之宮中及長試守代州別駕豪宗大猾閉門自斂不敢干法尋詔還都蕭嵩引爲麾下自請以精銳數百襲虜斬賊首五千級杜希望薦其才詔赴河西進拔其城天寶元年北討奚奴三遇三克進軍磧口上平戎十八策累著戰績少勇敢善鬪及鎮方面專以持重安邊爲務常曰太平之將但當訓練士卒不可以人命邀功名於是多遣間諜乘隙破虜自朔方至雲中據險築城斥地甚遠邊人以爲自張仁亶之後諸將皆不及四仗符節控制萬里高市馬之值以資國用論石堡之取得不償失安祿山築城雄武忠嗣料其必反將而多謀於是可見後以李林甫積不相能重誣以罪賴哥舒翰力陳其冤貶爲漢陽太守卒追贈兵部尙書

郭晞子儀第三子善騎射嘗從父征伐克復兩京戰賊最力河東軍亂首惡就戮餘黨欲變晞選兵警備七十餘日奸人竟不敢發以功拜殿中監吐番回紇入寇率師援邠州與馬磷合軍敗虜虜渡涇水復來布陣晞俟暮賊半濟擊之斬首五千級居父喪值朱泚亂賊昇致之欲汚以官佯瘖不答數以城中事貽書李晟乘間奔行在天子還京累封趙國公卒贈兵部尙書

郭曙子儀第七子德宗幸奉天曙方領家兵獵苑北聞蹕至伏謁道左遂從乘輿入駱谷霜雨塗潦衛兵或異語曙與功臣李清令狐建李彥輔披甲請見言南行路險且虞姦人乘間爲變願更迭挾持御馬而行帝許之車駕還京擢金吾大將軍卒封祁國公

郭昕子儀母弟幼明子肅宗末年爲西安北庭龜茲于闐碎葉疎勒四鎮留後北庭去京兆長安七千餘里吐番陷關隴昕帥將士閉境拒守數遣使奉表皆以道遠不得達聲聞隔絕者十七年虜多方誘說卒不爲動代宗大歷十四年密遣使自回紇中來天子嘉其志節詔封安西大都護四鎮節度使

郭旼子儀侄懿安皇后叔父也爲人謹讓不恃權勢文宗立以旼有將略除邠甯節度使帝取旼二女納宮中柳公權請於帝曰聞取郭旼二女有諸帝曰有之侍



皇太后耳公權曰外人以爲收納女而取方鎮何也上即於太后處遣二女歸謂公權曰微卿言幾辱收矣後收爲金吾大將軍封鄭國公

郭釗曖之子昇平公主出累宦至工部尚書邢甯節度使俄入爲司農卿謙和接物恭慎自持居家臨民無驕奢之失當世甚禮重之穆宗在東宮因中貴人私議廢立遣人問計釗曰殿下身爲太子當旦夕視膳何外慮乎時稱其所言得體歷踐藩鎮所蒞簡約不撓其俗自理敬宗二年出爲劍南東川節度使文宗太和二年南蠻寇西川杜元穎失于控禦朝廷以釗兼領西川釗致書於蠻首領筆巖責以侵寇之意筆巖歸咎於杜元穎與釗修好而退朝廷嘉之授成都尹劍南西川節度使後以疾求代詔入爲太常卿在道卒以上名將

王瞿曩事親以孝聞鄉里母歿水漿不入口數日晝夜號哭毛髮盡落形體枯悴塋後墓門三年不掩夜嘗寢於棺側服闋仍依依不忍離人嗤爲愚瞿曩不顧也其天性肫篤世亦雅重之

郭曜性沈靜體貌瑰傑爲人孝友廉謹以破虜有功授開陽府果毅都尉至德初累進太子詹事太原郡公當子儀外戰留曜治家少長千人皆得其所崇儉朴不事豪華子儀薨曜遵遺命悉獻四朝所賜名馬珍玩等物德宗復賜之曜推恩散諸昆弟居喪能守禮弗食肉御內蔥薤亦不入口建中三年卒贈太子太傅諡曰孝

郭旰子儀之次子子儀攻崔乾祐兵至安邑乾祐走賊安守忠壁永豐倉遣旰與戰旰素孝以父有命多殺至萬級旰死於陣進收倉於是關陝始通云以上孝子懿安郭皇后唐憲宗之后駙馬都尉曖之女憲宗爲廣陵王時納爲妃貞元十一年生穆宗元和八年冊立爲皇后及穆宗嗣位尊后爲皇太后敬宗立尊爲太皇太后朝臣以敬宗冲幼累表請太后臨朝太后曰昔武后稱制幾危社稷太子雖少但得賢宰相輔之內臣勿預朝政何患國家不安豈有女子爲主而能致唐虞之理乎即取制書手裂之羣臣稱善后歷位七朝王居太母之尊人君行子孫之禮四十餘年宣宗大中二年崩於興慶宮諡曰懿安皇太后祔葬景陵

漢陽公主唐順宗長女莊憲皇后所生始封德陽郡主下嫁郭鏐永貞元年與諸



公主皆進長安爭尙奢靡主獨儉嘗鐵簪布裙文宗尤不喜華麗欲諸公主取漢陽公主爲法問今之弊何代而然對曰元和後數用兵悉出府庫麗物賞戰士由是民間狃以奢靡若陛下崇儉德示所好於下誰敢不變帝悅詔宮人視主衣製廣狹徧示諸主且敕京兆尹禁止浮靡諸主化之嘗誨女曰先姑有言吾與若皆帝子驕盈貴侈可戒不可恃開成五年薨以上列女

宋

寇準字平仲幼通春秋三傳年十六以父陷蕃上書太宗辭色激昂太宗壯之後官至右諫議大夫樞密副使改同院事性忠亮喜直諫無顧避時人語曰寇準上殿百僚股慄贊帝立太子真宗即位契丹內寇勸帝幸澶淵大獲勝捷契丹懼議和自是南北弭兵準之力也在相位用人不以次卒後贈中書令萊國公諡曰忠愍入鄉賢祠

邊翊字待價晉天福六年舉進士宋建隆初爲洛陽令太宗卽位遷吏部郎中充廣南轉運使初至桂州守張頌卒頌灘州人藁葬城外舊制不許以族行僕人乃

分匿其家財翊召官吏悉追取之部送其柩歸灘州太平興國五年代歸拜右諫議大夫領吏部選事後移知開封府年六十三卒帝聞歎惜數四

韓丕字太簡幼孤貧有志操通周易禮記太平興國三年舉進士聲名籍甚公卿多薦之者端拱初拜右諫議大夫知河陽濠州不起寒素性畏謹冲澹不事奔競太宗甚嘉重之淳化二年召入爲翰林學士終以遲鈍不敏於用罷職後歷典州郡雖不優於吏事而能以清介自持故時稱其長者云

畢士安字仁叟太平興國初爲翰林學士知制誥後進吏部侍郎薦寇準兼資忠義善斷大事又爲之辨誣未幾以本官與準同拜平章事契丹內寇與準合辭勸真宗幸澶淵終却鉅敵成功而還卒諡文簡

趙湘字巨源舉進士歷彰武永興昭武三軍節度使遷太常博士上補政忠言十篇召判宗正寺又上書言元德太后母育聖躬請附太宗廟室後均用其說以糾察刑獄改尙書刑部員外郎兼侍御史又言舊制文武常參官日趨朝赴待漏院俟禁門今則辰漏上始放外朝者入多後時望敕正衙門察晚至者以懲其慢時



帝親製五箴以自儆湘因言宗室風化所本願特製銘以賜南北邸帝悅爲製宗室座右銘

蔣偕字齊賢幼貧有大志侍父疾刲骨父愈詰之曰此豈孝耶曰情之所感實不自知也舉進士以秘書著作郎爲大理寺果斷不阿密州豪王泚使奴殺一家四人泚及奴罪當大辟宰相陳堯佐欲寬泚偕與判審刑院宋庠持不從偕以是知名後遷比作坊使兼本路鈐轄明珠康奴諸族爲寇偕潛兵伺之斬獲千餘儂智高反除韶州團練使爲廣南東西路鈐轄賊方圍廣州偕馳傳十七日至城下戰士未集會智高徙軍沙頭安撫楊暉檄偕焚糧儲退保龍州坐此降潭州駐泊都監軍卒贈武信軍節度觀察留後 以上名宦

李薦字方叔幼孤能自立稍長以文學稱謁蘇軾謂其文筆瀾灑有飛砂走石之勢附其背曰子之才萬人敵也抗之以高節莫能禦矣薦再拜受教而家素貧三世未葬一夕撫枕流涕曰吾忠孝是學而親未葬何以學爲即別軾客遊四方以藏其事於是不數年盡累世二十餘柩歸葬華山下鄉舉試禮部軾典貢舉欲

薦諸朝不果軾亡薦爲之相地下兆經紀其身後事 名儒

畢仲衍字夷仲以廕爲陽翟主簿方鎮許請於朝欲興鄉校具材計工聽民自以其力輸助邑子馬宏謾弄諸豪以口舌敗其事邑人張昇疑敕縣且止上疏欲辯仲衍曰無益也取宏治之不辯自直矣令攝縣事即逮捕驗治五日得姦言所在遂流宏鄧州一縣相賀嗣調沈邱令以密閣校理同知太常禮院擢起居郎畢仲游字公叔與仲衍同登第調環慶轉運司從高遵裕西征運期迫遽陝西輓夫三十萬一旦悉集轉運使范純粹等皆不知所爲委仲游仲游集諸縣吏商榷翊日大運遂行元祐初召試學士院擢第一加集賢校理後知耀州歲大旱仲游先未饑揭諭境曰賑施與平糶若干萬石富室知有備相勸發廩民就食者十七萬九千口無一人去其鄉徽宗時歷吏部郎中墮黨籍坎壈而終 以上名宦

元

劉仲德字中侯官元順帝朝明師陷通州從駕北巡順帝崩立幼主脫古思帖木爾於陰山圖恢復屢戰敗績且被明將藍玉虜皇子買的里八剌以去洪武五年



冬明太祖遣使致書嘉尚許皇子歸仲德竭力事君二十餘年以臣節終張思孝母喪以孝聞父疾調護甚至不愈以父涕洟半器垂泣盡飲之復潔齋致禱乞以身代未幾遂痊至順三年表其門

明

王維楨字允甯嘉靖乙未進士選庶吉士與修會典晉修撰歷官南京國子祭酒維貞以著作名世然深沉有大略時太平無事獨留意邊防好觀古今名臣事略凡關隘扼塞備禦疏密之計皆歷歷指陳庚戌主會試發策以大同邊無成績薊州更有遺謀西至宣大東抵山海爲邊千二百里使幹濟之臣戮力經營患可稍弭是秋薊州果有警上采維楨議特設總督一人專備薊遼辛亥冬陞諭德署南京翰林院事念南京王業根本江海上游宜虞戒不虞每縉紳過從輒訊兵馬錢穀之事未幾倭寇下江諸郡人始服其先識後歸省母疾過華岳廟爲文祭神請以身代倏遇地震卒祀鄉賢祠

王庭詩字言卿嘉靖乙丑進士授內黃知縣神明愛惠識拔黃吉士劉光祚諸人

先後歷顯宦遷禮部主事與同官王敬美王和石孫月峰鄭崑岩相友善俱一時名流備兵濮上會江陵公子爲其父修禱泰山直指諸公盡出陪從庭詩獨不與焉

劉士忠字純卿年十四從父讀書豐塔寺論古有識迥異常兒萬曆甲戌登進士歷官江西道御史行部三晉時清丈事起議者欲加賦復黃冊額士忠持不可曰額徵田也田徵實也奈何羨虛羨而中民實禍乎賦得無加再按中州計臣有欲襄中州賦二萬有奇者士忠抗疏罷之時上以天久陰霾感臺臣之言下詔思所以當天心者士忠莊誦歎曰大哉王言遂條上五害一重折二盜寇三惰農四慢令五宗室上覽奏色動辛卯復按順天諸戚畹勸貴相戒毋紀約束曰是聽馬御史也甲午晉順天府丞庚戌三月晉右僉都御史總理河道復攝漕撫以禽倭功賜白金文綺諸若沿河列障闢飭郵傳事事完整而未嘗於歲貢外糜官一錢其節省金精無算以積勞成疾疏乞骸骨不報及疾小間猶力起閱皇陵檢運道屹屹不倦會廷推南廷尉命下間道歸來逾歲卒著有三巡奏議大河志叙漕運奏



疏

王廷謨字敬卿年十七舉於鄉越十年登萬曆庚辰進士第三人授翰林院編修與修會典晉修撰尋以病告歸會丁亥戊子間關中薦饑死亡枕藉庭謨施繩席瘞之又捐穀五百餘石以賑餓者全活甚衆辛卯疾又作復遭親喪哀毀遽卒識者傷之著有左傳臆說祀鄉賢祠

郭性之字德安少時赴省試至灞上見有溺者卽出金救之不問姓名而去萬曆甲戌登進士授戶部主事見倉米多腐建議穿地丈餘甃甌甃以木覆之積貯無所損晉郎中出爲晉陽僉事晉陽地多斥鹵引汾水灌田悉成膏腴遷參議備兵雲中察敵審將運籌決勝三載邊民不見兵革遷參政備兵金復海蓋值倭躡朝鮮獨力主海運遼左賴以鞏固三載轉河南左布政司使政治廉明入名宦及本郡鄉賢祠

王振祚字熙寰萬歷丁未進士歷官山西布政使以阻建魏忠賢祠罷

孫紹統字昌之萬歷癸丑進士授杞縣令歷諫垣遷山東按察使政聲彌著因論

魏璫削職璫伏罪死起原職以病歸事繼母至孝內外無間言居鄉數載病卒祀鄉賢祠

張必大字可安中天啓壬戌進士授山東新城令調長清俱有惠政東魯有神明之譽臺司交章舉薦會推吏部以不拜逆璫生祠旨留中不發 丁艱歸崇禎二年補工部都水司主事督理顯陵工上疏言陵底雖萬世重地然民爲邦本當此三空四盡之時尤當節用愛民中外駭愕省帑金二十七萬上召對文華殿諭以節省太多誠意可嘉賜綵緞白金命視榷杭關中道病卒祀鄉賢祠 以上名臣

車泰字子陽洪武中歲貢除戶科給事中歷遷山東參政靖難兵進攻德州泰與鐵鉉協力攻守不下隨機應變兵莫能克擢鐵鉉兵部尙書進泰左布政使命翰林學士作長歌贈之永樂初以前事逮京念爲高皇帝侍從舊臣免問調四川左布政

郭瑾字良玉景泰庚午舉人選磁州知州施德育民民至不訟瑾問曰何以不訟民曰不饑不寒無屈無冤何訟焉後徙守蓬州蓬民亦化之故有流徙他地聞風



負耒耜而歸者甚衆會歲大饑謹請發倉賑貸院司牽制舊例瑾泣曰吾所育者天子之民獨不能告天子耶遂上聞得旨允行蓬民全活無算九年入覲蓬民赴闕借留以疾致政祀鄉賢祠

東思忠字進伯年十二遊太學觀祀事凡俎豆樂舞之屬莫不備問而具識之成化丙子進士授刑部主事錄畿內刑獄不避權要平反爲多故危疑之獄皆就決焉歷官四川按察使松潘兵備累奏捷蒙賞蜀地西北依爲長城祀鄉賢祠

席汝寧字慶之成化乙酉舉人授交城知縣縣民有兄弟析產爭地數年不決者都察院命汝寧訊之汝寧知爲小人唆使因窮治主唆者各正其罪又作詩感悟之兄弟相泣竟不分家治縣九年歸里壽九十七卒祀鄉賢祠

張壽字永昌成化丁酉歲貢授樂城知縣清儉自持政無巨細皆以愛民爲心百姓保留在任十年民號曰張佛祀鄉賢祠

東思恭字進賢宏治癸丑進士拜兵科給事中彈劾務存大體時雲南酋猛密判遣兵歷年守臣以聞乃命思恭蒞其事平感瘴癘而卒祀鄉賢祠

石祿字君錫宏治乙未進士歷官四川僉事平獍蠻有功陞四川左參議謝政歸王宣字以道宏治戊午舉人知海門縣平易近民民孚其政縣多水患宣隄防曲盡其道民有賴焉甫一載卒於官

東漢字希節宏治戊午舉人正德中授池州同知招亡附籍戶口增於往昔二萬劇賊劉七流劫江湖吳楚間漢選民兵數千人陣於要路斷賊往來晝夜嚴守賊不能犯石埭章仁謀反漢計殲渠魁餘黨悉散胡天龍連結王浩聚衆行劫分兵大洪諸嶺並通夥祁地界凡數十戰賊敗遁三月遂平時有程文寶者劫殺人匿胡三隆所文寶賄捕者反誣三隆縛於官漢察有冤色鞠之文寶吐實抵罪人服其神陞南京戶部員外郎寧藩之變部議齎金募兵諸當行者輒不往漢獨請行又返其羨金旣爲郎中清覈江右錢糧得五百萬石宿弊一洗陞南昌知府鎮守黎太監怙勢張威誅索無忌獨不干知府會錦衣使者至意有所干黎黨聞之曰姑且止東太守剛直不可犯也歲大饑出粟賑之他郡悉來就食不爲禁日均吾民奈何分彼此耶活者數萬遷長蘆鹽運使致仕祀鄉賢祠



東野字希孟正德間進士授陳留知縣民健訟巨細輒赴臺省野爲聽其大者劇者細事以義退斥之遂自相解釋不復訟河溢爲害野築隄拒之更以其淤爲桑麻地流亡來歸益戶口數千陳州劉某刺典史善賂自脫野窮其事誅之於是河朔數百里皆欲赴懇陳留士習樸陋不知古今野廣購書集教勸士始嚮學陳留素彫敝至是沃野相望盜賊稀少尋陞刑部主事

張縉字正儀宏治甲子舉人授新鄭知縣縣多沙鹵荒穢不治民頑好訟縉勸課農事右善良懲奸佞均賦役民孚其政辛巳世宗入繼道經新鄭文武百執事以萬計縉措置有方事克以濟時流寇逼境縉設備治戎寇不敢犯甫三載以母疾歸養鄭人思焉

東郊字希宋正德辛未進士歷官監察御史武宗將幸居庸郊抗疏諫止中外愕然時錢寧怙寵納賄郊據實論奏江彬竊弄威權玉帛子女索無虛日太監張陽謀鬻鹽席百艘以供其求郡邑擾害莫支郊力爲禁止奸黨啣恨左遷潞州判官張潛字用昭生而穎秀日記數千言宏治壬子楊遂菴督學關中以慶陽李獻吉

洵陽張光世與潛爲三才子秋試三人同舉丙辰入對大廷俱登高第潛授戶部山西司主事經畫節制各當其所時劉瑾用事深用避匿或曰公鄉人也不往且有禍笑不答會擢平廣知府時積奸肆虛民不堪命盜賊流劫郡邑潛多方捍禦郡中賴以無事旣而按行屬邑省財力均徭賦黜舞文清滯獄興禮讓郡邑熙然向風擢山東左參政尋罷歸祀鄉賢祠

李蘭字秀夫正德丁丑進士授戶部主事賞軍宣大間毫不染餘銀盡散給軍士士感激奮戰督理永平山海薊州等處糧所至剔釐積弊有功陞郎中人號曰鐵郎中出知重慶府收恤鰥寡振作士習重慶稱治

劉邦正字兆吉以歲貢官通許縣丞時高寵寇作縣令惶懼失措憂鬱成疾邦正曰事誠在我乃設策剿平以功擢曲陽知縣

王堯弼字唐臣嘉靖乙酉舉人知孟津縣負才通敏行政惠柔會縣城圯於河堯弼奉詔改建克襄厥功奉法不染晉戶部主事尋拜徽府右長史以疾告歸著可

山集



王溢字懋中遊學咸寧石谷王給事之門嘉靖丁酉舉人授東鹿知縣下車即修文廟以興教化革除宿弊令行禁止法不少貸尋陞裕州知州弛張莫測人憚其才越年餘致仕

王榮浩嘉靖甲子舉人任山西平順知縣鑿池蓄水發粟賑饑招撫流亡教民紡績

郭宗憲字允橫萬歷丁酉舉人性純孝不以賢智先人及授廣平令清靜嚴肅不尚鈎鉅而民自畏服遷刑部四川司員外尋改雲南司郎中金商吳姓者以盜買內庫珠暮夜餽萬金求宥宗憲立叱去復託當道者力爲求解宗憲執不允閱三日出爲雲南尋甸知府未任卒祀名宦祠

張遂號伸吾性好學博涉經史無有間晷萬歷戊子舉人知芮城縣地狹民窮且多水患遂引汾水教民灌田息訟平戎賞善懲惡循良稱最轉山東泰安知州尋告歸

郭宗振字允震萬歷癸卯舉人授河陽知縣地當午道官商絡繹供給盡出民間

宗振念民不堪命力革去之邑有額外征四千金宗振請罷又有巨室難治宗振以禮接不設崖岸時有一公子奪人田逼婦自刎宗振竟制以法境多盜能獲盜者賞重金盡捕治諸盜移守壽春境內萑苻之徒聞風解散郡北居民被水患亡之他郡宗振捐俸五百金架屋招集來歸者六十餘家人名曰郭公集地多荒曠教民開墾給牛種寬賦稅旋里後殉癸未之難著有正氣歌葱玉堂雜記祀鄉賢祠

李燦然字爾美少勤攻苦門無雜賓萬歷癸卯舉人官濟東知縣居官狷介不畏彊禦陞太原府同知時爲魏中涓立祠燦然挺挺不屈人以爲禍而公怡然自若會丁內艱歸里

潘學會字省予孝友肫篤萬歷癸丑進士爲保甯府推官政尚簡靜恒謂國家繁費百出所在蕭條若不力敦節約民困其何以堪丙辰猗賊流劫郡邑學會拮据矢石間指揮方略遂獲渠魁兩川悉定

宜訓字孟庭以恩貢授峨眉知縣時縣南多水患縣北旱魃爲虐訓鑿山引水蓄



洩有法灌田數萬頃南北之民悉賴之晉永寧知州因母老告歸祀鄉賢祠  
武清周字永之萬歷戊午登賢書知文水縣見饑舍圯捐俸更新建修書院集士  
日爲課業士風丕變邑多萑苻之盜相機殲撫盜化爲良時交城爲盜所破清周  
兼攝交篆悉捐俸金招撫安集尋調汾陽以小失去官民攀臥泣留公怡然喜得  
將養性至孝親老嘗着五色斑斕之衣垂白效孺子啼其孝無間於宗族  
馮志萬歷乙酉舉人知山西介休縣蒞政精明本以仁恕尋調文水縣縣地瘠民  
貧婦女不知紡績志令夫人召鄉婦至署內教之公餘出遊見鄉有惰農者婉言  
勸導民皆丕變邑以殷富山右有神君之譽後陞太原知府頌其德者立生祠祀  
之

宋學程字肖明少嗜古性慷慨崇禎庚午舉人授山東沂縣知縣愛養士民有廉  
吏聲會邑有蝗災學程積誠禱之蝗遠不爲害鄰邑蒙陰正賦夙多逋欠臺司命  
學程兼治之不煩鞭朴賦完報最尋遷永平府推官 以上名宦

孫邦直字廷言宏治壬子舉人歷官真定府通判尙氣節遇事才識通敏時稱爲

古直者流楊埋菴祭文有曰今之人古之心詭隨者議其固也紛華者議其僻也  
貪污者議其矯也蓋實錄云

杜臣字朝卿歲貢生選灑池訓導授經謹禮却金辨冤撫按交獎之後陞延長王  
府教授以正論闢異術王亦感其訓誨年老告歸壽八十二卒

孫玉字汝成幼穎敏事親孝年十二以易補弟子員嘉靖戊戌貢國學選榮陽訓  
導及陞代府教授嘆曰吾自髫年有志於當世今老矣未遂此願退與二三子論  
古述道不亦可乎遂不赴任而歸

張士鵬字叔上萬歷己卯副貢性正直嘗遊長安馮少墟之門得窺聖賢心法歷  
官清豐通渭歸德密雲教授課士嚴言動必以禮法嘗曰官無崇卑位卑而自任  
卑亦崇位崇而不自任崇亦卑吾盡職而已豈知他哉任教職十年諄諄訓誨名  
士多出其門著有嚴石齋集

劉文華字明軒萬歷中歲貢歷周府教授以敦本立行爲教事親至孝待諸弟友  
愛甚篤家貧甚銳志向學一介不苟規言矩行必法前賢居鄉謙讓仁恕好談論



古今嘉言善行一時文人爭師事之鄉里有爭鬪者輒取平焉

于廷極郡諸生性孝友制行端嚴平日見貞烈孝義事務竭力表揚遇愚蒙惑邪說婉切訓譬不少倦必曉悟而止交遊取與慎擇不苟師事長安馮少墟安邑曹真字渭上史蓮勺三先生問難間有發人所未發三先生嘗深禮之後講學本郡開元寺重躬行實踐不事訓詁辭章之學書法亦高古

梁都汴字經原性至孝博通經史行文得雄傑氣天啓辛酉舉人崇禎甲戌進士授都察院都事致任居家數十載能甘澹泊平易近人毫無仕官氣鄉里重之著有肖心堂稿祀鄉賢祠

宋瓚字印和爲人敦大節務實行不苟言笑日與正人君子爲伍補郡學弟子員爲崇禎守制二十七月著有鄭社詩

羅一俊字斗南少穎異體魁梧篤志好學博精天文地理易數讀書考終之日仍攤卷弗廢壽九十有七

張本德天啓閒人初習釘戲稱後以鬻帽爲業聞馮先生談學有感遂購先儒語

錄潛體密玩每有所會輒舉以告人惟恐不同歸於善嘗從都憲曹真子先生學曹亟許可晚遊憲副張忠烈公之門禮待有加張之諸子以德非士流頗怪之張大聲斥曰汝輩名爲士流實不知學渠雖非士流卻知學汝輩不以爲愧乃反以爲怪耶德聞之愈感勵樂善慕義終身不倦李二曲先生自童年聞其人後質之同蒲諸友信然

白奐彩字含貞號泊如出馮恭定公先生之門明末與張太乙武陸海諸君同講學後所與遊則同州黨兩一王思若張敦菴馬立若蒲城王省菴諸君以道誼相切劘並推爲關中學者 以上儒林

南釗字希古天順庚辰進士歷官河南右參政體魁悟性嚴毅幼好學文辭爾雅不事雕琢爲郡諸生時每日謁學宮請業後遂騎驢城外散步壘上誦讀置驢草中如是以爲常以子問淹通聲名籍甚

張光孝字維訓嘉靖丙午舉人授西華令廉明慈惠修城有功爲人孝友敦睦搆辭摘藻落筆數千言著有左華集黃亭記事三邊志大河志華州志理學名臣傳



東棐嘉靖乙酉舉人授確山知縣以著作名於世著有唐宋名臣筆錄祀鄉賢祠張士鯤字北溟光孝仲子萬歷乙卯舉人授良鄉令勤吏治晝夜弗暇一時百廢俱舉遺疾告歸負才英邁工詩文善書法著有世編竹韻菴詩存

郭宗周字允穆能詩孤懷平恕不囿于俗父方伯公鹿坪備兵雲中時宗周往省過雁門上谷居庸淪關諸險要嘗與少保安肅鄭公論文上下古今口如懸河及論雲中邊務兵狀如指諸掌鄭公大奇之與方伯公書曰郎君公家鳴鳳豈直千里駒哉性孝善事父母無間言尤好施予萬歷丁亥歲大饑宗周減饗賑郵全活甚衆子姓有貸重金而不償者宗周折券不形於色嘗構齋曰高閒四列圖史以靖節自況著高閒齋詩草

郭宗昌字允伯弱不好弄不屑與羣兒伍稍長嬉戲磨礪雙作碑鐫字摹榻得晉人筆法年十八補弟子員下帷誦讀博覽經史及秦漢諸子手不釋卷爲文得左氏史遷法名冠一時嘗避喧耽靜闢地建閣曰松談著書其中著有松談閣稿金石史筆史印史二戎記六齋疏

王承祉字雲岷方伯庭詩公仲子性敦厚和平善屬文能詩年二十聲聞三輔居家三十餘年優游咏歌以詩文自娛絕不與聞世事所著有雲壑集

東元天性孝友深於學問書法得晉人遺意與郡人王司成郭江都以文字相友善雅有論述

李葵字自春爲郡諸生家貧甚歲大饑郡侯周饋之粟辭曰此粟尙可活一鄉民藜雖貧不至饑餓死也周賑民益力旣而西北行邊使過華騶從甚盛葵抗言遮說使者納其言供億從儉嘗曰論道不在多言爲學當明義理初講學於雙楸道菴從遊者祇一二人越數年來學日衆卒之日焚棄著作門人曰先生不欲後人述先生耶曰予平生好古去古人遠甚諸子若執古道不廢又何少予言耶時號爲雙楸先生

東蔭商字雲雛崇禎丙子舉人意氣道上學問淹通詩文咸有法度尤好書畫精鑿賞著有華山經二卷臆略十卷

王承之字季安與崑山顧亭林華陰王山史本郡郭允伯相友善著有水陽秋諸



書 以上文苑

王維英字子才少補諸生以不第投筆試武萬歷甲午領解首乙未登進士丙申守備四川甯越衛時諸蠻叛服無常官吏不能善厥職維英肅之以威撫之以恩所在軍民畏威懷德後二年土官楊應龍告變播州維英往征之未幾獻馘擢雲南都司光宗立特恩贈三代昭勇將軍忽中風痺乞病歸卒於家 以上名將

姬文允字士昌萬歷癸卯舉人任滕縣知縣視事甫三日紅巾賊徐鴻儒陷鄒滕嶧三縣文允率民兵三百守城免胄示賊喻以大義賊弗從至晚城破文允緋衣坐堂上嚼齒罵賊賊前裂冠裳以銀鑰鎖之文允大罵曰賊胡不速殺我賊顧不忍越三日不食勸之食不可勸之去又不可時賊防小疎文允急令小吏魏顯照家僮李守務持印潛出遂題詩壁間曰欲生義不可急死勢不能徬徨三日間誰云我偷生又曰殺賊無寸鐵罵賊見孤忠從容就死難何謂非令終題畢遂正衣冠北面拜者再以謝無逃之義西面拜者再以謝罔極之恩遂投環而死諡忠烈祀忠孝祠

姚應卜馬安者常遇春部下兵隊官也元末華郡棗磚坪有盜據險立寨稱號五年時遇春入關遂遣千戶姚應卜百戶馬安勸之二人引兵夾山奮戰羣盜敗散二人尋病卒就地卜葬土人號為姚馬村云

王玉汝字爾成天啓辛酉舉人授嶧縣令惠保如春嚴法如秋士民奉為神君崇禎末寇薄城身殉難從祀嶧縣亞聖祠並祀本郡忠孝祠

李華國號敬齋由吏員任濬縣尉崇禎末寇入城強華國知本縣事華國弗從罵賊自經死祀忠孝祠

范祖淹郡諸生好性理學即一步一趨亦弗苟崇禎甲戌寇至執淹淹諭以大義寇弗聞淹遂罵賊火焚而死祀忠孝祠

姬文啓郡之義勇也崇禎甲戌八月流賊寇華州文啓奉州牧命同羅國楨史曰環王紹禹馬任等十八人與賊戰於柿村文啓等喋血無噍類賊死亦衆當道高其義為建祠以祀並祀忠孝祠

王者佐山東新城縣主簿崇禎末逆賊入城自刎以殉祀忠孝祠



徐邦瑞字臨臺崇禎甲戌寇執邦瑞迫之使降邦瑞罵賊不從賊刃之祀忠孝祠  
東肇商字雲駒諸生性敏多學詩文英駿寇至人皆逃匿肇商飲酒不輟挺刃而  
出大罵賊奴遂遇難祀忠孝祠

徐應龍山東鄒縣典史崇禎七年流寇掠鄒縣應龍被擄不屈以殉臨死顏不改  
色祀忠孝祠

徐應鰲四川雅州吏目崇禎七年十一月二十九日寇過雅州應鰲被擄蹈刃不  
屈而亡祀忠孝祠

李嘉賓號近塬山東鄒城縣典史崇禎末寇至城陷嘉賓被執不屈大罵賊殺之  
至慘祀忠孝祠 以上忠烈

趙珪監生父歿廬墓三年母歿亦然白鼠赤蛇馴遶墓側祀忠孝祠

石璞增廣生勇敢知兵有行行氣慨正統己巳敵犯邊璞慨然曰此吾致身立功  
之時安能久事筆硯乎遂詣京隸勇士籍遇敵於狼山衆懼將敗北璞奮身力戰  
敵不敢前遂奏捷以功擢留守中衛指揮後親歿廬墓三年祀忠孝祠

張之渠字儀正嘉靖壬午舉人侍母東安人疾延醫問藥夙夜不怠母卒廬墓三  
年枕塊蔬食夜雨雪伏墓哭曰母素畏寒吾母今大寒矣聞者悲之自負土築邱  
垣取水遠村忽墓側有清泉湧羣鳥集噪白雉白兔馴遶墓側里有惡少市肉奉  
父父大異少年曰兒見張孝子矣彼爲其親死而獨哭我有父在事之可不奉肉  
耶又擬孝子步趨曲折之狀以悅其父人以爲悉張孝子所感有司旌表其門祀  
忠孝祠

李爲芝字明瑞四歲失怙恃育於祖母性至孝爲諸生時移居城內及遇寒食往  
鄉拜掃觀塋城湫隘嘗泣曰人子於親生不能養死不能葬祭無以成禮何以立  
於天地間哉遂負骸骨遷葬南郊中萬歷癸未進士歷官戶部員外郎遷九江知  
府祀忠孝祠

孫繩祖自幼失怙事祖母吳嫡母宋生母姜孝養備至祖母疾醫藥必親嘗疾篤  
夜則焚香籲天求以身代尋吳卒寢苦枕塊哀毀骨立躬自負土壘塚留妻侍養  
二母獨廬墓側三年及二母卒亦如之祀忠孝祠



劉國仕字仁英讀書期於躬行母病瘵久侍醫藥致心悸疾事父定省溫清數十年如一日父小有疾即憂形於色曰吾親有疾若吾病在心不若吾身病易受也事兄如事父以父命當異爨數日哭不食性厭塵囂終身未入城市惟閉戶教子以存心養性爲本後居父喪年六十竟毀瘠以歿祀忠孝祠

郭宗儀字允甫事父方伯鹿坪公別歷中外二十餘年未嘗離左右父卒勺飲不入口三日幾至滅性葬祭盡禮三年不飲酒落筆慮於墓側晨夕擗踊數易寒暑不見齒虎嘗環廬咆哮侍者驚仆宗儀坦如嘗嘆曰禮淪亡特檢古禮諸書著有四禮攷

郭有光字美充崇禎庚午歲貢家至貧臨財無苟得事二親色養兼隆父久病禱以身代侍湯藥衣不解帶者彌月後父痊伯父堂兄無子俱奉親歛葬性耿介不畏疆禦郡有待御史廝臺人多附之有光偶同席即義形行於色曰光雖不才不願與臧獲伍即面叱出其人亦素憚光弗敢抗郡守范聞而壯之祀忠孝祠

張志行字臨田事母劉氏極孝母卒哀號幾死事繼母崔亦如其母與異母弟志

伊志遠居志行體父志讓田讓居無恚色祀忠孝祠

楊久諫字蓋軒崇禎庚午鄉薦事母羅氏孝母患風痺朝夕弗離及母歿哀痛泣血水漿不入口者數日三年未嘗見齒令節良辰必哭奠哀號嘗抱風木之恨思親過傷致疾卒祀忠孝祠

楊得春字冬函性穎異七歲好書嘗讀孝經色喜及母亡家貧無資寄食從母家得春事如生母年十三父卒京旅計聞自恨幼不能昇屢歸越二年夢父病伏狀語曰汝何不一來省我耶寤痛不能止浩然往尋抵京至寄骨寺徧問弗知日夜痛哭閱數月忽夜半風雷交作大雨如注蚤起寺後瘞骨處陷一穴春驚疑之迺曰父子天性也古有刺血以認骨者遂禱神破指血滴骨血遂入號泣悲痛幾不欲生遂負骸歸營葬如禮太守竇公表其閭後試入郡庠年八十餘卒祀忠孝祠羅璧華字季明廩膳生事繼母甚謹會母疾侍藥朝夕弗倦飲食必候母食始食母弗食亦弗食有古人一飯亦一飯再飯亦再飯之風祀忠孝祠

東周性至孝精醫理親有疾病衣不解帶者兼旬自爲藥餌調治及鄉人來求醫



者無不盡心診視多賴以生

王廷義性孝友精岐伯術善醫藥恒以濟人親沒廬墓三年不茹葷不御內鄉人賢之

古之廉字靜字年十一喪父事母必視飲食寒暖終身未有懈志母服藥必親嘗有弟偃僕母憂之之廉體母心受室同爨白首無間言叔父某牧巴州卒於任之廉親舁叔父骨於三千里之外合叔母如禮葬祭崇禎癸未逆賊入關累召不起隱居青崕以終 以上孝友

宜元吉字祥寰萬歷丙申渭水大發太平諸水亦泛濫田卒汙萊元吉施粟捐金修理河渠水土平濱太平渠者至今賴之

王肇禹字開夏崇禎癸巳薦饑斗米值六十銖有奇罷市五日嗷嗷者衆太守鄧甚恐肇禹請曰願輸粟迺出粟千餘石活者計一萬九千餘人時兵餉缺乏肇禹助餉一百五十溢當道咸高其義先是肇禹祖濟民於成化間輸粟八百石賑饑時稱祖孫世濟其美

李養氣字連池崇禎己卯歲大祲養氣分財濟衆饑者賴焉順治初山寇掠人勒贖時有王氏全家被擄養氣出重金贖之王全家得歸里中有殖貨者盜竊其金夫婦幾自經且妄擬竊者以聞於官養氣力止之並出金以償之不三日竊者以金擲其家其以義感人類如此

楊守榮號近溪崇禎庚辰薦饑渭上黨自真抵華羅粟亡銀二十八兩守榮見而拾之自真號痛來尋守榮問其故盡還之自真謝以銀守榮不受而去

戴永才崇禎辛己歲大祲出粟五十餘石以賑饑時符禹水發橋梁頽壞永才製杠木以濟行人便焉

吳進恭號南樓慷慨好義扶危濟急有古人風常拾金還人當世咸高其義孫耀統號輝字崇禎末連年饑饉白骨相枕籍耀統捐粟賑濟得活者衆人每頌其有齊黔敖之風云

高三汲字望槐性情端方周急濟危崇禎壬午歲饑三汲施餽粥濟人順治己亥修葺瓜坡衢路力行善行遐邇交稱焉 以上任郵



東思恭妻姜氏思恭卒氏守節深閨人不得窺其面祀節孝祠

東野妻王氏守節五十餘年絕無嬉笑之色貞晦居德撫孤成立鄉婦咸敬憚之  
祀節孝祠

張禎之妻姚氏言動端肅善于教育撫妾侯氏遺孤不啻己出日哺之食夜抱以  
臥姚年五十孤吮乳下時人稱曰賢姚四乳後子孫衣冠相映壽九十一歲卒祀  
節孝祠

東允妻孔氏讀書秉禮善撫遺孤孤死有孫又教成立守節四十餘年百苦備嘗  
子婦宋氏亦守節盡孝學使者榜其第曰姑婦節孝雙全祀節孝祠

東羣芳妻郭氏節烈婦也羣芳病亟謂曰我死汝擇人而事勿誤汝青年也郭泣  
以死矢之其妾王氏侍于側曰我非婦人耶何永訣而弗及我羣芳死郭命匠作  
二棺王亦乞一棺郭曰汝亦同我志耶遂作棺三爲羣芳立嗣守制三日以代三  
年遂與王氏縊於柩帷左右初王氏之謀縊也其母知之匿身俟郭氏死遂解王  
氏縊王甦怒曰我重綱常救我是誤我也尋復縊死祀節孝祠

宋堯妻高氏年二十堯卒氏仰藥以殉後堯弟宰亦卒宰妻宋氏時年二十五守  
節至七十七歲里人稱曰一門節烈祀節孝祠

李鉉側室孫氏年三十一王氏年二十三萬歷二十四年鉉卒或給以嫁或給以  
守二氏曰所生不辰安求生乎閱數日孫語王曰千金易得寸心難回王頰首無  
言午夜孫王遂經于柩之左右祀節孝祠

范崇淹女年十五字古師仲未廟見寇至時崇禎丙子正月也女避寇西南原舅  
氏家寇又至女急投崖寇追扶馬上至康家溝又投崖崖下劉生家屬扶女歸飲  
食弗受未幾又聞警復投晉井劉生救弗出遂不言而死祀節孝祠

徐渙女嫁于任某爲婦崇禎甲戌寇至婦隨姑避賊柿村南葫蘆溝遇賊因奔失  
其姑處哭聲震野賊刃婦項索婦從婦曰誓從吾姑死不從汝輩生遂遇害祀節  
孝祠

劉應栢次女年十四賊至搜女于壁間強之弗從良久賊欲東行怒叱曰汝欲死  
耶女引領伏地賊刃而死應栢奮起刺賊臂衆至焚其家祀節孝祠



胡守才妻胡氏從夫爲酒家保崇禎丙戌賊寇柳子鎮不及避賊突入室呼婦爲炊婦大罵曰吾不畏死豈爲汝輩炊耶守才懼呼婦爲炊婦又不肯大罵賊奴而死祀節孝祠

徐光榮長子妻徐氏早寡生一子受書師家還遇賊氏奔救子母子俱被執賊扶氏馬上氏知不能免遂給賊曰家貲在鄰舍井中至則氏投於井其子亦死祀節孝祠

拓惟展妻王氏寇至惟展夫婦俱被擄王氏啣賊搜他家脫去賊出視不見呼衆至拓家氏已懸梁賊奮斷帶一擊至地而死祀節孝祠

吉家瑞妻李氏崇禎甲戌氏遇賊強馬上仆地者三罵曰我曾耳大家訓身爲諸生婦豈能從賊輩耶遂被刃死祀節孝祠

鄭光普妻王氏崇禎甲戌寇至三家店光普病氏侍夫弗避其父宏講迎入城堅弗就賊至被執同婢叱賊賊迫之愈急遂大罵賊斷頸而死祀節孝祠

田徹女崇禎癸未年十六時逆寇入關女避難于舅氏家寇掠堡中女從堡城投

隍而死祀節孝祠

劉光祚妻王氏年二十光祚病氏進湯藥弗倦及病篤光祚泣曰予病弗起汝年少盍改適氏泣誓曰妾幼遵母訓從一而終請以死殉未幾光祚亡日夜哭泣寢食俱廢姑母伯姊慰曰以死殉夫汝志也奈劉氏之宗祔何幸汝方娠若產男子劉氏可不絕尙慎旃哉氏少釋未幾氏產二子喜且泣曰劉氏幸有後子可以報地下矣氏復泣涕廢食姑與姊又慰曰汝死于汝爲得奈雙雙弱赤何氏曰予向不死者謂有今日今幸產男而二子復何待遂七日不食而死祀節孝祠

李允恒妻屈氏年二十七允恒卒氏甘貧勵節志終不易孀居四十五年事姑劉以孝聞教子華實成立時稱之曰完人壽七十二卒祀節孝祠

王汲引妻甘氏年二十三汲引歿遺子好問甫七齡氏矢志堅守教子讀書守節六十年卒祀節孝祠

姬業妻劉氏年二十五業卒遺子文顯文謨氏苦節教養嘗以糟糠自甘壽九十有八卒祀節孝祠



張自得妻黃氏年二十八自得歿氏抱姪養浩爲嗣視若己出時舅姑在堂氏孝養無缺堅志不踐二庭守節五十二歲祀節孝祠

王庭諫二女郭仲樸仲煥之妻長女年十九樸卒育子民藩成立守節七十八年次女年二十二煥亦卒無嗣與姊同居堅節四十五年而卒姊妹同祀節孝祠

張養性妻劉氏年二十八養性卒氏矢志堅貞孝敬舅姑其子光啓亦孝氏得壽七十告終光啓廬墓三年氏祀節孝祠

馮熙暉妻母氏年二十一熙暉卒氏欲以死殉或勸勵節氏遂教子士奇成立後爲泗州同知有能吏聲氏壽六十三卒祀節孝祠

王乾亨妻黨氏年二十五乾亨歿氏誓無他志撫育子女後長子璽倫妻常氏年二十一亦寡日奉孀姑撫三歲兒已而孫亦殤妻顏氏年十九亦有孤子成立黨得壽八十一常得壽八十二顏得壽八十鄉黨稱曰一門三節俱祀節孝祠

李克朝妻武氏年二十三克朝歿遺子三齡兄欲奪其志氏守義愈堅孀居五十二年而卒祀節孝祠

張衛瑞妻郭氏賦性耿潔事親至孝生子景元方七歲而衛瑞歿氏欲自縊姑慰之曰從一而終婦道固然汝死子將誰撫氏遂撫子成立得壽七十餘卒祀節孝祠

潘文秀妻魏氏年十八文秀卒遺腹未生氏堅志全節奉養舅姑後生子從善亦早逝妻張氏撫子國玉國璽亦成立時稱爲一門雙節祀節孝祠

史明薦妻王氏年二十七明薦卒遺子鏞甫月餘氏守節撫孤之死靡慝時翁姑垂白氏亦善體親心克盡婦道茹苦四十一年祀節孝祠

王喬松妻姬氏滕縣令忠烈公之女也年十七喬松卒遺子丕謀方二歲氏矢志守節撫養弱孤且性至孝善事姑生死葬祭井井有禮祀節孝祠

宜元階妻梁氏年二十七夫亡無出撫前妻子怡如恂如不啻己出後長子遇賊見殺妻武氏時年二十五姑婦相守里人見美祀節孝祠

范居惺妻甯氏年二十二居惺卒無子伯叔欲奪其節氏斷髮毀容以自誓育猶子玠教以詩書歷遭兵荒志節彌厲即至親往省闔門而與之言皆不踰閫守節



五十餘年祀節孝祠

王璠妻郭氏年十八璠亡無子氏奉事舅姑以至孝聞冬夜紡績兩手皸瘃不知其寒守節五十餘年祀節孝祠

郭旬妻王氏幼讀列女傳孝經諸書頗明大義及笄歸郭氏生子一鳳翔年二十一旬卒氏孝奉翁姑生死盡禮勤勞教子守節二十四年卒祀節孝祠

孝女劉氏甫三齡父大器卒母陳氏時年二十四守節撫女女十二母病女日夜號泣遂禱諸神誓以母瘳不字茹蔬終身尋母瘳女消室焚香虔事諸神卸除鉛華晨昏衣帶不小緩日以紡績供母餽粥已而媒灼至輒怒憤欲自經於是母亦善全其志女家素貧同產兄二長自得仲自穩女其季也薄田三畝莊屋三間兄妹三分之女與母居會自得夫婦歿遺子三齡女舍食以食乃獲成育未幾自穩夫婦亦歿又遺子二女又撫之成立母于天啓辛酉年八十餘以壽考終女年五十八毀瘠哭奠終三年喪春秋伏臘時食必薦後奉 勅建坊曰孝女坊女壽八十五終祀節孝祠

王承勛女貞而孝幼字黃宗憲崇禎七年宗憲被寇虜去女之死靡慝願奉舅姑親執棗栗時年甫十七于歸奉親茹苦甘貧後翁故女哀毀營葬事姑益篤勤勞艱辛積苦成疾貞節二十二年冰操無間祀節孝祠

宜理妻王氏事繼母至孝母病氏寢食俱廢禱諸神願以身代及于歸事舅姑克執婦道姑疾目不交睫七閱月未離牀第姑三日未進湯藥氏亦弗食三日姑卒氏幾死鄉黨宗族皆稱孝夫嘗出外氏訓子寓恩於法俱得成立祀節孝祠  
宜元賓妻孫氏夫婦相敬如賓萬歷己卯三月夫病百藥弗瘳氏割股以進疾遂痊里巷咸高其義祀節孝祠 以上列女

國朝

張鯤翔字鵬九順治丁亥進士授合肥知縣遷工部主事出權荊州繼權蕪湖羨餘一無所私事父有禮事繼母尤謹丁艱歸杜門謝客不一投刺當路起復補工部虞衡司郎中卒

陳斌如字野叔副榜貢生任河南林縣知縣時南征吳逆奉文養馬助軍曲盡經



畫水旱蝗蝻請蠲三年租賦之三民建生祠以祀後由戶部郎歷任廣西蒼梧道布政司參議尋解組歸逍遙林下不謁公門當道重之

魏蓋臣字子修順治丁酉副貢授雲南通海知縣以興學校勸農桑爲己任創建書院振興文教升戶部郎中以疾卒於京邸

陳恪字備三由貢生授中書舍人歷升河南懷慶知府却鹽商陋規救河內水災七城士民感德建生祠以祀陞通政司參議順天府府丞提督學政

史茂字君躋雍正甲辰進士授山西河曲知縣時用兵西陲自京運馬四萬五千匹從縣沙泉驛經過地缺水茂禱龍神是夜忽報水大至迄事竣水竟竭詳請上官建龍神廟後由戶部主事陞郎中晉京畿道監察御史屢上疏有嚴禁京債短

票禁絕上司餽送苛派禁服飾華麗嚴肅朝議預備蝗蝻分廠煮粥諸疏陞順天府府丞享壽七十有二

秦清字荻江乾隆庚辰進士累官御史勳名節絕干謁劾奏貴戚某王禍不測大學士和坤慕清品望力救免陰使人風以謁相府申謝清曰免罪公廷拜恩私室

吾不爲也後侍 睿皇帝助耕藉田 特旨 賞御牛時以爲異數

王士棻號蘭圃乾隆甲戌進士改庶吉士散館授刑部主事升郎中總辦秋審處在刑部二十餘年 純皇帝深器之然與大學士和坤忤故雖內官侍郎外官按

察司而屢起屢躓終不能竟其用初和坤提督九門以番役某爲心腹某霸佔通州車行州民控於刑部士棻發某黑龍江爲奴 純皇帝拈香碧雲寺見池水突

竭訝之查以寺後煤窰引泉別流之故 聖怒甚逮主窰某交刑部嚴審某故和坤家奴窰亦坤所開也士棻嚴鞫定讞堂官將有刪減爭之曰如有他咎願一人

當之堂官如議奏 上切責和坤而置主窰某於法遂擢江蘇按察使及由江蘇入覲值公主下嫁和坤子士棻不往賀於是和坤怨益深尋以旗人霸地私徵一

案奉特旨升補本部右侍郎旋以司官任內檢驗失實發新疆効力贖罪未一年釋回奉 旨補授江蘇按察使以高郵州書吏舞弊之事又被和坤劾奉 旨

准其贖罪交吏部帶領引見仍以刑部員外郎用士棻居官持法明允未嘗故爲深刻而輕重當律在刑部平反數百獄皆足爲治獄者龜鑑如章邱辛存義向屠



戶魏貞子索債被殺於途兇器即屠刀縣擬抵罪其兄控京士棻奉命往讞躬赴章邱密訪從幼女賈丑姐供中究出正兇張大擬罪貞子得釋旗人某兄弟異母而同居兄鰥弟有婦夜被殺母控兄姦弟婦不從致死士棻往驗從旁訴說者其母之姪也士棻指訴說者曰汝殺人而誣其兄以我爲可欺乎其人戰栗不敢對嚴鞠之始吐實內閣失官銀數百兩上震怒將供事李翰等六人交部嚴審承審者擬重辟尙書胡公令士棻覆訊棻窮兩晝夜力將李翰等昭雪予枷杖而別緝正賊邳州有舅告甥夫婦毀母墓州擬夫婦凌遲律士棻親提訊甥乃前母之子舅乃後母之兄後母有子幼欲獨據產舅爲妹設謀別囑一人告其長子曰汝母墓有洞似蛇迹須燻以火甥愚偕妻往其舅暗伺叢墓間突出執之官以親舅目覩定重辟士棻平反之時天久不雨案結大雨如注人比之于公治獄云

王志灝號幼海乾隆壬子舉人初由藍田教諭保薦知縣選直隸威縣調山西靈石縣革驛馬支差之弊擒劉雅常祿李世洪等置於法修汾隄絕狼患任靈石八年興利除害無虛日歷升絳州直隸州大同太原知府四川東道山西冀寧道

清操雅望爲當世所推 以上名臣

劉澤溥字太室崇禎壬辰進士補亳州知州時亳屢遭兵燹民貧賦重初下車即汰煩賦緩催科減遞馬禁客兵通賈惠工尊齒尙賢境內翕然稱治會旱虔誠步禱刻期雨降一境得蘇後告歸杜門謝客惟與華陰王山史相往來其美政備載

亳州

郭忱舉人官浙江嵊縣知縣嵊地瘠貧忱蒞任課農興學孜孜不倦發奸摘伏豪猾斂跡時聞帥俞與陳某有隙假支應不給爲詞將爲亂忱夜半奉上官檄赴營招安諭俞以大義事遂解後卒於官祀鄉賢祠

王惟籌順治戊子解元逆圖之變負母入山備歷艱苦康熙四年授山西祁縣知縣祁水舊爲豪強所據惟籌責令毀壩資民灌溉祁民感之婦子携羊酒躋堂稱壽旋爲立祠

史流芳字蘭署康熙壬戌進士知廣東臨高縣臨民舊積欠額徵銀八萬有奇芳綜核戶口每歲徵只三千餘兩復履畝丈量分別荒熟請豁者十之七由是招集



流亡捐給牛種課農興學闔邑感戴請祀名宦祠兄景芳客死肅州徒步三千里扶輿歸撫兄女如己出凡族子之孤貧者悉爲婚娶卒祀鄉賢祠

張雋字書升康熙戊午舉人知直隸武強縣弭盜勸農民皆安業會旱蝗蝻生齋戒哭禱於八蜡廟須臾大雨蝗不爲災後以病旋里民追念不忘祀鄉賢祠

史昌孟字仲哲康熙甲午與兄振孟同登賢書雍正癸卯進士聞報泣下悲親之不逮養也丁未知浙江於潛縣潛邑城郭半圯倉庫空虛孟於撫恤中酌力役以期完實邑重蠶桑春夏之交民至不相往來昌孟減從入鄉勸勞潛人相謂曰體吾輩隱情至此此之謂吾民父母壽八十有一

黨蘭字馨之幼以孝聞蚤孤每逢佳節忌辰輒號泣終日爲南陽縣丞有惠政及歸宦裝不入私室焚香告祖宗曰此非欺君剝民物天地祖宗實鑒之其廉介如此

王曰仁字元善雍正元年舉人授四川大足知縣大足四川復設邑甫蒞任值新建倉厥衙署各工程拮据皆辦又創脩書院親訓士子歲旱禱雨有應邑民立坊

曰王公甘雨後致仕歸

王緝祖字敬夫乾隆丙辰進士知江西信豐縣信民素強悍健訟凡有控告輒以賂聞祖曰讀聖賢書作朝廷官不爲一方興利除害而枉愛民錢吾不爲也乃致仕歸

李灼字春芳事孀母詹氏克盡子道雍正丁丑進士授桐柏知縣抵任以學校農桑爲首務桐人頌其廉明時金川用兵經營軍務不使累擾百姓適隨州有董世廣家被劫大案因稽查戶口獲盜六人由是晉秩同知授貴州思南大定知府以母老告歸服闋補福建福寧知府延建邵道卒於家

杜肯堂字子實雍正甲辰舉人授山西興縣知縣興邊邑民有訟則逃鄂爾多斯公嚴行保甲法使不得混籍加意撫字以勞動卒於官

張德標字望齋以蔭生授浙江瑞安知縣蒞任三載治行稱最調署永嘉海墘潮溼學宮傾圮德標捐俸重修人文蔚起永嘉舊有歲糶法損民益官標力革其弊嘉慶丙辰秋颶風大作壞廬舍無數標按戶核賑哀鴻得所攝篆四載仍回原任



行之日瑞民騎竹歡迎永民臥轍不起闌城溢郭一時傳爲盛事

段瑩原名瑊字焯生舉人任四川洪雅新繁知縣天全知州平時親率健卒按捕盜賊宵小斂跡在新繁督修隄堰並於近河義塚醴資勸令遷徙創設有嬰會及工藝所俾輕罪者咸令習藝其餘發奸摘伏善政指不勝屈後卒於天全任所貧不能歸同人醴金飲助始克返里 以上名宦

郭德元字善堂以武舉從征廓爾喀授千總黔楚苗疆不靖奉調往屢立奇功升守備未幾湖北教匪起檄赴湖北見各帥皆移營避賊憤甚束兵自成一隊每出奇計以少擊衆奉 旨賞四品頂戴德元感激誓以死報國嘉慶二年四月追賊襄陽德元先驅約總兵某督大軍繼之既而不至德元血戰陣亡奉 旨給雲騎尉世職入祀昭忠祠孫大鵬以武生襲廕署潼關華州汛把總同治元年率團堵陣亡於州西赤水鎮蒙 恩給予世職

楊發少有膽略道光六年廓什喀爾張格爾叛隨楊公遇春出征破喀什噶爾城復從總兵胡進勦賊大敗分股逃竄發奮追至鐵蓋山賊棄馬據峻阪發礮鉛彈

雨下發直前撲之生擒張格爾以獻捷聞 上嘉其功授固原衛遊擊 賞直勇

巴圖魯繪像 紫光閣升固原參將嗣因懋直忤當道意罷職咸豐間 上登紫

光閣閱像 召見復原職時髮逆林鳳翔據揚州 命從欽差大臣琦會勦親冒

矢石力破重圍卒以本營兵黑夜梯城而上援弗至乃死賜卹甚優給世職 以上

名將

武丕爵字大勳乾隆丁卯武舉任甘肅紅巖堡守備屯田塞外勤於供職補清水營都司出征金川領兵六百守大板與賊五戰皆捷賊精兵數千復來丕爵力戰三日士卒多死不爵身被數創猶力斬十餘人及卒手仍執刃神氣如生從卒携其冠歸報奉 旨優卹

李庚字少白由舉人大挑知縣分發山東補金鄉在官多善政以疾告歸同治壬戌髮回亂陝庚督率鄉團屢挫賊鋒卒以兵力不繼團潰遇害得 旨優卹

羅雲錦字子卿由舉人大挑知縣權知江西星子縣髮逆陷城公與郡守某都司某俱被擄都司逃歸據述賊勸子卿降不從鞭數百罵不絕口卒投江死繼配狄



氏年二十三聞變欲殉難以公前妻遺二子俱幼携歸撫養家用盡出十指節義  
觥觥時以爲雙璧合美云

趙文明字伯閣諸生性耿介 國初流寇之變爲賊所執脅明大怒曰人生天地  
間正身爲本吾恨不能爲國殺賊乃從賊耶拔刀刎頸而死

王正元年七十餘筋力强健壯心未已同治元年髮逆擾境知州濮公率民團防  
堵赤水鎮元督衆擊賊被傷殞命濮公具衣棺葬之

弋連珠字虞軒增生性豪邁不羈庚申秋顯皇出狩灤陽借里人王建功畢士欽  
華陰陳茂經上書當路願率鄉團勤王當路難其事止之同治任戍回亂率團渡

渭擊賊孝義鎮東賊北犇追勦間援賊大至被戕奉 旨給雲騎尉世職

王錫命廩生回逆渡渭帶團丁二百餘戰於村北斃賊甚多忽賊騎數百衝入衆  
潰錫命瞋目大呼挺身血戰力盡而死奉 旨給雲騎尉世職其父生員啓謀弟

生員錫貴於同治五年十一月初八日捻匪擾境亦同時殉難

楊學文字博卿庠生品端學富澹於浮名以舌耕爲業門下士成就甚多回逆渡

渭挺身禦賊鄰人有止之者曰吾當以身殉難遂遇害其徒生員劉堪同日不屈  
死

劉學貴素有胆略回匪之亂集團防渭賊南渡銳甚衆不支貴持矛力戰知不能  
敵念廟內積火藥甚多恐爲賊資令劉和春焚之復戰身被數十刃臨死罵不絕  
口和春焚藥撲火死

劉月順善長矛回匪之亂率衆防渭與賊戰於村北殺賊甚多以衆寡不敵退至  
巷口復戰被執縛樹上謾罵不絕拔舌剖腹死

劉茂林回逆渡渭與賊巷戰不勝且戰且走退至渭南堰頭村父啓德被圍林冒  
圍入救父命逃林不忍去遂同遇害

劉萬齡逆回之變與弟萬守率團防渭賊南渡兄弟奮勇堵禦力竭同時遇害

曾道成回逆突至成求免其母懇以身代賊不允竟殺其母成偕弟道全覆母身  
同時遇害

楊芬回叛率團防渭賊不敢南渡者二十餘日六月初二日賊東自王家莊渡河



西自周家莊渡河氛甚惡衆皆潰芬曰丈夫死耳何走爲與團勇朱萬春等奮臂殺賊力竭陣亡奉 旨賜卹

楊懷仁回亂負父避鳳居山賊又至父恐爲子累命亟逃仁不忍曰弟在外宗祀有託何逃爲以身覆父賊持矛刺之墮崖俱死

劉均字政平舉人幼好讀楊椒山傳嘗以忠烈自許捻匪寇關中均率團堵赤水鎮團潰被執勸降弗從脅以白刃均奮然曰死則死耳何降爲遂遇害事聞給雲騎尉世職入祀昭忠祠 以上忠烈

李棲鳳字羽伯諸生父蚤卒事母以孝聞母疾湯藥必親嘗及終哀痛泣血葬祭循禮先是父病革遺言曰幼子喬甫周歲惟汝撫之鳳經離亂多方保全稍長親爲督提教之成立分產與之里中共以爲難

劉誥號謹軒性行淑均事親唯謹母亡哀號悲痛繼之以血三年未嘗嘻笑父歿廬墓日於辰午戌三時運土封之祁寒暑雨弗輟

孫蒼父名應禮居石隄峪之葦園年十七隨父往西石門樵蘇遇虎以爪扼父吭

蒼倉皇救之連斫三斧虎逸父竟得脫

王讀號啓吾父仕俊好遊讀方三歲就有于王父母年十三王父卒喪葬既畢讀素衣草屨徧訪父踪數年不可得有謂之曰汝有王母在堂父既不可知何若旋里代汝父事王母乎讀廼歸事王母時新必奉後聽孫孝子講子夏色難章益有所感遂謁長安馮少墟先生每于居室內外書色難二字高陵吳道平見之貽李密陳情表一篇讀朝夕諷誦輒泣下後王母九十二而卒

傅濟邦字惠伯性純篤年逾六旬親偶不悅赤足袒臂手一竿歌且舞博親一笑頗有老萊子之風

陳九疇善事繼母與繼母所生弟九錫相友愛盡以美田讓之其族叔巡檢膠州卒於官九疇爲輿槨而歸祭葬盡禮撫其子女婚嫁俾成立焉入鄉賢祠

秦繼世篤於孝友父臨終口不能言牽繼世手指枕下兄妹知有藏金爭取之繼世悽愴鵠立後有尤之繼世曰父子永訣方寸割矣奚暇計金乎

武兆麟諸生事繼母黨氏承順父志能得歡心父病癱飲食需人兆麟代爲進食



終無倦心父母相繼歿哀毀骨立幾至滅性

胡惟泰生母早逝年十二遭繼母挫折無所不至終無怨詞生事葬祭與生母無異壽八十有九

張正紳太學生父早逝母雷氏偶怒紳百計取歡有老萊之風母歿停柩中堂朝夕奠祭夜臥柩側不入私室及葬廬墓二年州牧聞之以孝繼曾閔旌其門

畢漢章庠生父坤生失明章求醫藥殆遍迄不效每夜焚香跪祝祈以身代未幾目復明家屢空竭力奉養親忘其貧

楊世貴家極貧乞食奉母恒自忍饑寒使母衣食無缺母逝哀號幾死貧無以殮藁葬焉過墓必跪拜里人憐其孝競周恤之

張寓江母老好食肉家貧無資傭工以給每飯必肉後母病癱數年支離床褥江親滌溺器除穢汚久而不懈

畢植晉太學生親偶怒長跪請罪及病乞以身代親爲煮藥親歿泣不食或勸之曰當大事須慎哭何益乎乃輟泣營葬盡禮三年不入私室

劉來儀字鳳亭增貢生候選訓導性至孝母患癱藥必親調嘗暗中籲天哀祝祈愈及沒哀毀骨立喪葬一切如禮又捐錢數百緡倡修沈陽石橋以便行旅

武信友少失怙家貧躬啖藜藿奉母必甘旨壬戌回變負母避居南山採樵易粟資以供炊

井長庚一歲失怙事母唯謹母病親侍藥餌衣不解帶母壽八十歲沒慟不欲生卒以哀毀過甚未幾病卒 以上孝友

史振孟字詵伯康熙甲午舉人官臨潼教諭諸生中有兄弟爭產者諭以至情其人感悟交相推讓孟家七世同居壽九十二

劉紱字公來事親孝雖饕餮不給甘旨不敢缺父歿事九旬祖父竭力奉養後以乾隆丁巳進士官慶陽府教授

張世錫字白石修華州初志後修陝西通志郡人奉爲模楷

黨希賢郡庠生時建郭汾陽王塚地畝丈尺頒有定式平去民墓甚多希賢祖墓居其三具呈伸辦獲丈還地畝卒保祖墓後以長子聲震貴贈禮科掌印給事中



史尊字果亭雍正乙卯舉人任江南石埭知縣卓有政績學問宏博著再續華州志十二卷

史芝乾隆丁酉拔貢直隸布政司理問性伉爽好義時因西陲用兵借秀峯書院爲驛館士子肄業無所公於城西隅施地一區倡捐千金親建堂廡齋舍數十間額曰少華書院

井蓮字玉峯郡庠生持躬端正每言爲學當求切己好讀周程張朱全集尤嗜中孚李先生所著二曲集反身錄兩書刊有聖學真脈一卷濟人利物之事指不勝屈

郭國植字周卿廩生回亂時負父避澤口父歿不能棺殮植日夜哀慟鄰里贊助之具禮葬焉

張致道字造之廩生性嚴正博學好古未冠失怙事繼母以孝聞歲饑自啖糠粃爲親供餐逆回肇亂里民多築寨自保致道實爲之創人多賴焉

段澍霖字崑生同治庚午舉人華州徭役最重霖白於閻文介公敬銘爲之入奏

得 旨輕減民至今猶歌詠之

劉域字子正舉人潛心聖學尤好諸儒語錄纂三續華州志父病年餘親侍湯藥無倦父卒哀毀盡禮人多稱之

楊桂林字月亭貢生爲人端整守程朱遺法光緒丁丑（疑是辛丑）關中大饑桂林主賑事公正無私立文會局有嬰局有狼患籌資募人搜捕會匪田貴賓起桂林密諭諸團擒之樹桑百餘株興蠶利爲鄉人式當路爲請於 朝賜國子監學正銜 以上儒行

胡文簡素貧窮而性極廉介嘗往三峽店拾趙果銀于途守候三日遇果來即以原物還之

秦紹丕增生教授生徒以立品爲先成就人材甚衆鄉里有婚葬不能舉者即量力以助事過毫無德色子婦劉有弟名玉二歲失怙不令就已家教養婚娶俾克成立

張法震字長公歲貢生尙義好施沙河潰決捐地十餘畝俾衆築堤以防水患六



坊七里咸戴德焉

趙紳字縉卿乾隆十一年捐助社倉重修文廟城隍廟已捐重金並力肩其任壽七十五年卒

李文星性朴厚事母孝周人困乏鄉人稱曰李善人

吳必善和睦鄰里勤於稼穡荒年族黨有不足者輒慷慨濟之負債無力償還者悉焚其券其孫太學生肇基於乾隆庚寅年散麥數十石賑饑郡守潘榜其門曰

高義指困

胡元穎好善輕財乾隆三十五年遇仙橋被水冲塌元獨修木橋以便人行及官修石橋又捐貲成之次年歲荒又散穀麥數十石

王福棟字隆庭家素貧業商通州後漸豐裕未嘗吝財救災扶厄鄰里親族有日不再炊婚葬不能舉者輒周恤之壽八十有餘卒

秦法雍好施予族兄朝士妻早逝遺子守德無依撫養不啻己出壯爲娶妻生子一室同爨人不知其爲族姪也

楊建烈與兄建極建文建武弟建謀孝友樂施乾隆辛卯春殞霜村不舉火者建烈咸資助之丁酉秋被水又按戶給以錢麥被災百餘家悉賴存活

孫治世字天平品端方遠族婦李氏貧寡無依周其家十餘年不使缺乏又有族姪少孤撫育若己子

劉得地太學生有析居堂弟食指衆多恒苦困乏公指一困與之略無德色待鄰里貧者類如是性嗜讀尤敬重文人知名士皆與之交

張清棟祖孫父子及一門羣從均以行善爲樂門庭雍睦尤有古風遇歲祲傾家周恤或典衣助賑嘉慶十八年官爲請於 朝賜榜曰七世同居

李煒李炳李煥兄弟三人乾隆五十二年出資百餘金重修安家橋州牧樹碑紀其事

宋世揚字芳聲乾隆戊申武舉好義樂施雖耄耋不倦八世同居內外雍睦

杜昌哲字明庵嘉慶庚辰歲荒於高塘鎮煮粥賑貧存活千餘口州有紅水渠溝深泥淤捐金創建二橋人無病涉里人至今稱之



張緒寵立義塾訓寒家子精岐黃活人無算道光乙未歲歉出粟以周貧乏韓正茂多智巧先是赤水鎮週圍數里爲瀆水民不得耕茂相度地勢與鄰人張進誠勸衆治水道分秧插田收穫數倍人獲其利

楊文泰字階平與同村楊文信等會衆籌款設義學道光丙午大饑富室困積居奇無賑濟意泰信故寒士勉出粟以倡設廠煮粥者數月潞河修堤急公忘私人倚賴之

魏建昌字長盛太學生西灌峪路阻道光間捐萬金鑿山開路百餘里行人便之季子武生振遠孫守徵光緒丙子助義倉麥百八十石丁丑歲饑又捐金施濟本村貧乏者又隨在周恤祖孫父子世濟其美

劉蔚清太學生有公舉必竭力以捐輸得員外郎銜子仁杰武生亦慷慨樂施咸豐初軍務告急屢次倡捐計數萬金髮逆過境焚掠無算堡衆被圍幾潰以數百金賂賊賊歡然去衆賴以全晉官遊擊孫如龍年弱冠能繼父志光緒二年捐義倉穀千石嗣因災辦賑又捐五百金撫院譚旌其門曰積善餘慶

呂運聲太學生幼從父貿易棗陽縣同治壬戌髮逆掠關輔精壯東竄至棗邑有從賊中逸出者被官軍追獲將置之法運聽其語慘秦音知係脅從力請釋之獲免者二十餘人悉給以路資俾還鄉土

王浩治多隱德有隣人楊某借牛駕車牛忽斃其母索之鄰貧無以償浩治潛與錢二十餘千使買牛還之以悅母同治元年回變挾眷避構峪忽有五色石自山墜下約數丈橫臥宅南未幾峪水大發傷居民房屋甚多獨至其宅旁爲石所阻逼往東去全家無恙人以爲積善所感

劉邦俊素封逆回之變凡親故破家者周恤之賊破鳳居山尸骸盈谷出數百金募土人瘞之鄰里樹義塚碑誌其行

薛順興龍耳山北五里通商洛要路有兩水合流舊建梁高五丈長四丈日久傾圮每逢山水漲發行旅患之興獨力重修渭南訓導王與九撰文記其事

董學文業農粗識書家僅小康光緒三年奇荒賑務事急富室慳於解囊學文獨捐金以爲之倡親鄰告貸不能償即焚其券



衛建文字獻臣素豪俠弟建珍與兄同志鄰村爲秦家灘多回民與漢民往往械鬪糾衆幾數千人禍不可測得建文兄弟一言立解當時咸以爲有魯仲連風

魏鵬飛字搏九監生石隄河舊道輒決捐貲督修民享其利  
張致遠字伯通父早逝事母孝其異居叔應祥已出五服歿後召二子同居各爲娶室從弟致道析居已十五年光緒三年荒歉飢不能養其二子亦代養之 以上任郵

古葵以形家言遊澤州善草書酒後醉墨淋漓流傳甚多人咸謂有張旭之風  
劉智附生改有算書商除法悉爲歸除法以便初學

杜映芹字魯宮歲貢生母病乳癰屢醫不愈遂習岐黃活入甚多稱名醫

王志沂號魯泉蘭圃侍郎子性聰敏學問賅博幼隨任京師援例捐員外郎與修陝西省志性嗜金石尤好臨唐碑以書法名於時並精醫理嘗萃集諸醫書摘切要者著爲一編名醫學摘要尤有神於實用朝邑閻廼珏爲彙版以廣其傳

獨善性生員候選縣丞精岐黃善丹青按脈切方輒著神效山水法荆關寒林野

渡隨筆曲折若不經意諦視之殊神妙不可及 以上藝術

馬氏寧夏同知武嗣徽妻徽死守節事翁姑課幼子翁故文水令以年老子喪病益增劇氏百計慰解調養瘞撫孤至于成立

王氏義勇姬文啓妻崇禎七年寇變文啓往勦遂歿于陣妻年二十四子珏方三齡守節四十餘年事姑以孝聞教子成立

車氏王柄伯妻善事翁姑年二十九夫亡家貧子幼有勸改志者氏折簪自誓苦節五十餘年後以子貴贈恭人壽八十

李氏諸生劉枚妻夫患顛狂尋亡氏撫姪若孫成立甚多壽七十九卒

張氏吳允文妻夫故事姑撫孤備歷艱苦姑歿守孝六年人間之氏曰代夫三年子經國讀書成立

曾氏羅仲隸妻夫亡無子孝翁姑姑歿欲殉翁曰汝死如老翁何乃止翁歿日不舉火閉戶泣守族人嘉其節調之翁得瘞

杜氏舉人肯堂女王友生妻氏父講學生就學氏父奇之妻焉尋夫亡無子姑尙



存投繯者數次父任興縣令使人取之氏以有姑不赴年六十八卒

章氏張克昌母年二十一歲夫亡七日往誓於墓隣某私議曰青年矢志豈易事哉氏聞益自刻勵未幾克昌生氏事親撫孤不留餘力翁姑汲井灌田氏提甕助之姑諭勿苦氏曰二老作苦婦可偷閒耶隣里至今誦其言年七旬卒

康雍氏十七于歸未期寡夫又獨子父母憂之氏一日迎父母至家跪告翁姑曰非兒有大孽何至遽折夫命但此門無人承祀二老何以預爲謀乎蓋欲翁納妾以延嗣續也父母慰之曰兒存心如此天必錫福兒姑俟之時翁姑俱年五十有六矣次年舉一子氏盡心撫育禮祀賴以不墜

楊氏訓導劉來儀妻姑患癱支離床褥四十餘年氏日夕奉養愉色婉容姑歿哀毀不能食子二域均先後登科壽七十六

董氏孔維麟妾事姑孝姑齒病疴痛不能食氏以乳奉姑卒享壽八十餘嫡室雷氏警而妒譖氏于夫夫欲出之氏攜子跪泣曰夫十指不全姊雙目失明奚以供耕織願勤婦工奉箕終焉夫婦俱感動遂和諧如初

徐氏安進才妻家貧甚姑老夫瞽子幼氏乞食奉姑拮据萬狀無貳志年七十卒王氏王作植妻植遊定遠未歸回鵲變亂家人皆竄氏獨負姑逃至康家村賊突至被戕者多氏以護姑故賊憐而釋之

王氏李守業妻業年二十故妻方少艾有豪族賄氏舅姑奪而嫁之氏投井死王氏華陰徵君山史女歸生員劉莊澹靜淑慎事翁姑兄嫂克盡婦道孀居六十餘年撫猶子如己出

焦氏孫世賢妻年十四于歸三年夫出外越二十年相傳夫亡有以改節勸者氏曰夫果亡亦無再嫁理况生死未可必乎乃撫姪孫爲嗣織紡度日又十五年其夫携妾以歸氏且喜且悲遂爲夫婦如初

張氏武善緝妻夫亡氏孀居三十餘年織紡供子讀書

柳文強之妻王氏夫故遺子二歲家貧至於乞食有勸氏改適者氏泣曰餓死事小失節事大苦節四十餘年

東氏國學生郭成禮妻夫亡子方一齡翁姑以年少恐有他志令妯娌微探其意



氏曰我名門女也又爲世家婦詎肯改節以貽先人羞撫孤成立壽七十

呂氏舉人正宮之女幼習孝經年十九歸武門夫出外病故氏矢志柏舟常與鄰婦講孝經化者甚衆有親勸其再嫁怒而拒之絕其往來享壽八十六

李氏諸生劉漢英妻于歸時夫家與甥索姓同居已二世不數年翁姑與兄嫂俱逝夫亦歿遺一子表姪夫婦年幼氏常謂其子姪曰兩姓同居已更三世在劉惟子在索惟汝爾兄弟其室好無尤焉氏壽七十後五世同居其亦可以愧世之薄俗者矣

陳氏訓導法姚女適史叔繩年二十夫亡遺一女氏截髮自誓百折不回獨處一室非至親雖女賓亦弗面苦節三十年卒

李氏胡自振妻夫亡子尙在抱矢志不二守節撫孤父母翁姑憐其年少勸改適氏涕泣不食者數日議乃止苦節四十年

焦氏畢三棟妻歸後三年夫亡姑老氏操機軸以所得供甘旨生死盡禮操履堅貞內外無閒言

井氏白克賢妻青年守節子興唐復夭婦李氏亦矢志自守克盡孝道當事旌其門曰一門雙節

种氏王鴻誥妻治家教子恪遵女誠順治己丑山賊肆掠氏罵賊不辱死

史氏張起昇妻善事舅姑相夫以禮順治壬辰遇山賊之變賊殺其夫氏被執罵賊不從賊怒殺之

黨氏李賢娃妻夫死遺女幼孀姑在堂田僅畝餘欲撫族姪爲嗣族以貧不予氏績紡養姑姑沒稱家以葬獨亂與女被執俱不屈死

呂氏楊清和妻年二十五夫死遺子三養姑撫孤備歷艱苦同治壬戌獨變逆鳳居山賊搆山氏撲崖死仲子天赦尋得母屍亦死之

吳氏明經吳升階女歸張氏期年而寡時翁尙在以年幼勸再醮氏曰翁子只夫一人再醮誰侍養守節以姪星輝爲嗣回變氏謂人曰今翁逝大事已了難作可

從夫地下矣遂自縊時年二十九子星輝亦遇難

李氏劉永清妻同治元年逆回渡渭李謂姪婦楊氏華氏曰宜早自裁毋被辱同



立村南井側李先投井楊華繼之子女俱被害

梁氏劉萬鎰繼室撫前妻子如己出鎰死禮葬之回亂作賊至毫無懼色爲亂刃斫死

戴氏張訓導鵬翰之祖母壬戌回亂與子婦呂氏孫婦何氏罵賊被戕

趙氏監生獨廷柱妻同治元年回變翁遇害氏親往掩翁屍賊又至急投井死弟廷棟妻董氏扶姑逃時殺人徧野董以身掩姑伏積尸中賊用刀斫之見不動以爲既死而去姑媳得免董後刃傷潰發卒

曾氏胡學金妻同治壬戌與隣婦俱被回執欲辱之氏獨罵賊不從遂被害

魏氏李育坤妻回變夫外出氏携姑逃賊突至欲傷姑氏願代死賊殺之舍姑而去

張氏宋克讓妻壬戌回變聞警急逃賊突至窺其美擄掖上馬氏罵不絕賊怒斷其首

王氏袁廷壽妾以賢孝聞回逆破寨投廷壽於火氏趨入烈焰負夫屍賊削其耳

氏投晉井中越日村人出之氏懇葬夫屍尋以負重傷死

李氏趙得仁妻美姿色壬戌之亂賊欲擄之氏不從賊以刃斫其面氏牽其子女投井死

安氏徐年寶妻壬戌回陷寨欲污之氏怒詈賊言愛爾雙眼氏自挖其目死

張氏孫某妻回亂避山中賊至欲擄之氏回顧曰弟何不來殺賊驚顧氏撲溝適不死移避他處遇前賊怒曰此次尙可逃耶氏謾罵不屈賊殺之釘屍于樹

蘭白姐蘭忠孝之女幼字劉姓未嫁夫亡女詣劉氏矢不再適終日織紡不出閨門積勞成疾年三十八卒奉 旨旌表

李蓮逢春女年十六隨母避回亂乏食女隨嫂挑菜河濱賊突至殺其嫂女自刎不及被賊俘掖馬上女躍墜三次賊刃之不懼時去嫂屍二十餘步給賊曰余嫂所佩針囊是我鍾愛之物乞解取賊爲代取之女乘間用挖菜刀刺頸死賊至悵然

車女父生志年十七遇回於瓜坡鎮將擄之女自損華容罵不絕口賊怒殺之



劉小轉維清女年十五被回擄馬上女躍墜馬者再賊縛之至南沙堡乘間自縊死

井女太學生必選女年十六未字遇回欲擄之女堅不從遂被戕王氏呂從齊妻年二十夫遠出貧苦中儀容修整姦徒知不可誘欲強逼之八月晦氏摘新穫黃豆葉夜深倦極掩關和衣臥賊突入脫氏韞一隻氏覺取床刀斫之誤中榻入木數分刀爲之屈賊又近逼氏手握賊髮大叫堅不可脫賊憤急以匕首刺氏喉猶恐不死引繩勒氏頸氣絕始得脫報官檢驗獲賊正法當路爲請於 朝得 旨旌表 以上節烈

### 戶口

據現時編查數戶一萬九千七百有六口一十萬八千有七按舊志光緒八年戶二萬一千一百有五口九萬六千一百五十九又道光三十年戶三萬九百有六口一十五萬三千八百一十六以與現有戶口較則道光時戶多一萬一千二百口多四萬五千八百有九而以今較光緒八年數則戶減一千三百九十九口增

一萬一千八百四十八此其盈絀之大較也

### 人類

州境向有回種人今日爲土耳其族本突厥之音轉即唐書之回鶻也自唐中葉回鶻人來長安者或留居沙苑卵翼蕃息歷千餘年蔓及州境秦莊村一帶非族異心漸至桀驁同治初元乘粵賊竄陝之隙蠢動爲亂忠勇公多隆阿入關驅之西去自是州民無復異種

### 宗教

回教之入中國始唐元和中唐書回鶻傳所謂摩尼是也向時州人或有信從者自回亂平救其教遂絕光緒二十一年瑞典人來州西鄉沙漲村演說耶穌教居民擯弗聽旋引去二十七年來西關演說數日亦無奉之者去歲至今復時來城內演說聽者卒寥寥亦不以相駭愕彼亦不常住此極相安也

### 實業

州內共男丁五萬四千八百餘名除弱小不任執業外有實業可稽者不過三萬



三千數百名分計之士約居千分十八農約百分之六十九工約百分之十二商約百分之十七

地理

地理一門非閱歷不能得其真非訪問不能求其詳非考據不能徵其實故測繪輿圖即熟於測量精於準望亦第能知其道里之遠近形勢之險夷至於村名古蹟猶必詳細考查以求密合蓋考古即以証今由今亦可以知古也謹按例目所載特取山川道路祠廟古蹟之可據者一一詳列於後以備考核

形勢

華州南憑秦嶺北據渭河東連華陰西通渭南誠爲古今之輿區關輔之要地非若僻陋之區無關要害者也在昔轄縣屬地尙多今第論其現轄之地南北長而東西絀其東南一帶強半皆山而供賦稅饒財物者惟恃西南原及山外平衍地頗稱沃土然石田不毛河灘難耕總計猶不下十分之二故農業雖勤僅足自養而東西五十餘里可稱萬石君者殊覺寥寥蓋以其地勢南高北低中間微凹每

逢山水暴發沙堤不能收束輒至泛濫洪決村居盡成澤國此亦地勢使然無可如何者也惟是地居山麓上下二十餘峪水皆北注其間衆流滙聚非橋梁不能徑渡雖區區細流無關大局而有事時得人固守亦足以限戎馬而防盜賊今之督師立寨者於環營數里外必多掘壕塹以防不測若華郡之襟山帶渭沙河繞流亦可謂天然之壕塹矣誠能分途防守布置嚴密則一夫當關之地所在皆是亦何處非巖疆險阻哉

沿革

華州爲禹貢雍州之域周初爲畿內地宣王二十二年封庶弟友於此國曰鄭又名械林後改咸林嗣因平王東遷桓公子武公邑於虢檜之間稱曰新鄭遂以此爲古鄭春秋爲晉河外地戰國爲秦魏二國之境今華陰界有古長城秦爲內史地立鄭縣漢屬左馮翊又屬京兆尹東漢爲京兆宏農二郡地魏改尹爲守晉置雍州理京兆宏農二郡北魏置華山郡又於華山郡北置東雍州西魏改東雍州曰華州隋初郡廢煬帝初州廢以其地爲京兆馮翊郡唐武德元年改爲華州垂拱



元年改太州神龍元年復華州天寶元年改華陰郡乾元元年復華州寶歷中復太州寶應二年復華州乾寧四年陸興德府又為鎮潼軍節度使五代梁為威化軍後唐為鎮國軍宋初為鎮國軍皇祐五年改鎮潼軍節度領下邳蒲城華陰渭南四縣金改安軍節度屬京兆路元復華州後以鄭縣省入屬奉元路明因之隸西安府領華陰渭南蒲城洛南四縣成化十三年商縣陞州改洛南隸之嘉靖三十年改渭南屬西安府國朝雍正三年陞為直隸州轄華陰潼關蒲城三縣乾隆元年同州改府遂去直隸屬同州府焉

州城在太華山迤西八十里少華山之麓正西距陝西省會一百八十里東北距同州府九十里按州志載華州城池為唐永泰元年節度使周智光建及元至正年間平章公驢拓古城西北隅周七里一百五十步同治七年州牧王公因舊城寥濶難資守衛又於東南隅高阜築新城創西垣北垣二百八十九丈其東南則仍舊垣修補缺陷週圍七百二十八丈計四里一分高二丈至四丈不等其西門曰鎮乾北曰拱極東曰延春南曰瞻華

沿革表

唐	其地為華封通紀云堯觀華封華封人祝堯
虞	屬豫州通鑑舜分十二州封十二山其一曰豫華山
夏	屬雍州其地為華陰禹貢導河積石至於龍門南至於華陰
商	屬雍州其地為蕃水涇注渭水東逕轡都城北故潘邑殷契之所居世本曰契居蕃關駟曰蕃鄭西然則今轡城是矣
周	屬豫州周禮職方氏辨九州河南曰豫州其山鎮曰華山其地為鄭又名械林即成林周宣王封庶弟友於鄭鄭之名蓋起於是明張士佩雍韓考云鄭豫州之域也
春秋	屬晉國晉河外地左氏叙秦晉相失本末云晉侯賂秦伯以河外列城五東盡虢略南及華山又左傳文公八年秦伐晉取武城蓋得今州東北地



戰國	屬秦國 為秦魏二國之境蘇秦說魏襄王云太王之地西有長城之界今華陰界有古長城即秦魏之分境也戰國策云魏將與秦攻韓無忌謂魏王曰秦有鄭地與大梁隣王以為安乎		
秦	鄭縣 屬內史秦分天下為三十六郡置內史領關中秦武公十一年改立鄭縣今州西北地		
西漢	鄭縣 鄭本秦縣漢因之屬京兆尹武城本晉邑漢置	武城縣 武城縣沈陽之沈亦作沈舊在沈水北今州東南地	沈陽縣 因名漢置沈陽縣與武城皆屬左馮翊
東漢	鄭縣 本秦縣後漢因之漢下邳縣武城縣沈陽縣後漢俱併入鄭縣屬京兆尹	置華州	尋罷
三國	魏改尹為守		
晉	鄭縣 漢鄭縣晉因之屬雍州京兆郡文獻通考晉時京兆九縣鄭		

南北朝	華山郡 東雍州 華州 東魏置華山郡後又於華山郡北置東雍州西魏改東雍州為華州	隋	華州 鄭縣 隋初華山郡廢而華州如故煬帝初州廢為京兆郡文獻通考隋時京兆二十二縣鄭	唐	華州 太州 鄭縣 寶應以前三復華州兩改太州乾寧中陸為興德府領鄭華陰下邳樸陽四縣又為鎮國軍節度使屬關內道	五代	鄭縣 唐鄭縣華州治五代皆因之後周以渭南屬華州	宋	鄭縣 天禧間為鎮國軍以同州蒲城來屬皇祐五年改華州領鄭下邳蒲城華陰渭南五縣	金	鄭縣 宋華州治鄭縣金因之屬京兆府路又為金安軍地
元	華州 金鄭縣元省入華州屬奉元路領華陰渭南蒲	明	華州 本元華州明因之隸西安府領華陰渭南蒲城	國朝	華州 本明華州國朝因之雍正三年陞華州為直隸						

地理

燕京大學圖書館



城三縣	洛南四縣成化	州轄蒲城華陰
按世祖本紀至	開改洛南隸商	潼關三縣至乾
元十二年復華	州嘉靖間改渭	隆元年同州改
州鄭縣但地志	南隸西安府	府華州去直隸
未載耳		屬同州府

疆域

華州地在省城之東一百八十里東距潼關一百里東北距同州府城九十里州治新城居舊城之東南隅州署在新城東西之中偏北向南之高阜西連司嶽署署南為囿園東北有大公館公館東向南有學署東連文廟廟東有文昌宮由東而南城上有魁星閣西下有南觀寺又西北有城隍廟廟東有義倉又西有里民局又西有營汛署西城下有觀音廟又東北有常平倉倉西北有舊少華書院老城中心驛路北有關帝廟南有新建中學堂由廟而東有養濟院由學堂而東有齊雲閣由學堂而西南有南塔寺城外舊以四隅分鄉東北曰將相鄉東南曰仁義鄉西北曰孝悌鄉西南曰豐原鄉東北一隅驛路北由東關出有太平橋附近

有羅家村又東莊頭堡又東時家堡又東羅紋鎮羅紋橋羅紋舖又東南馬村又東蓮花寺蓮花舖又東柳子鎮又東迎仙橋又東接華陰縣界由州城直北沿渭河有大張鎮西嶽廟又東車家橋又東平定里六坊里吳家橋又東王宿鎮孟村里臨渭里又東通達橋又東拾村里又東止華陰縣之良村北界由大張鎮北接大荔縣之大村胡村又東止華陰縣之王家莊東南一隅驛路南由東關出附近有蟲郎廟越太平橋有駱家堡又東馮家堡南寨堡越羅紋橋有水堡白家河潭里河又東伏龍堡當舖堡又東曹家巷又名分界堡又東接華陰縣界由州城直南入山有羽坪又東南有五勝溝又東北有金堆城又東北有構子街東接華陰界南接商州雒南縣界正南山麓有甘露寺白石峪又東蕭家塢劉家河以南有甯山寺藏龍寺又東小敷峪小徑達嶺南又東有賀家崖半截山暴雨溝移山廟又東橋兒河又東構峪大道達嶺南又東鳳山峪又東為西方山接華陰縣界西南一隅驛路南由關鎮出附近有崖坡堡又西鉄爐巷又西老觀台石堤橋又西北沙澗軍趙底三峪店又西紅花里羅家堡其南為郭村鎮庵門前遇仙橋又西



赤水鎮水城堡又西分界橋接渭南縣界由州城直南入山自橋峪嶺南有青岡坪五勝溝接雒南縣界由石堤峪口迤南有馬家峪西北有瓜坡鎮又西南棋盤山韃空山又西北高塘鎮佛婆寺又西橋峪又北爲江村鎮又西東澗峪西澗峪峪內直達嶺底接商雒界由西澗峪口北澤口村谷堆堡東接江村鎮西接渭南縣清寧鎮由谷堆而北有寺前頭驛馬蘭家忠王村靳家村北至分界橋俱與渭南縣接界西北一隅由西關而西驛路北附近有楊家巷又西露澤院堡泥河堡西溪舖越石堤橋有雷家河又西朱村堡又西雷家斜杜家廟白泉舖又西瑞凝莊越遇仙橋有郭家村村東有橋又西蔣家村又西赤水鎮至分界橋與渭南縣接界由州城直北微西有侯坊橋接侯坊鎮迤北有聚仙橋沈陽橋橋東有王立渡過渭爲渭南縣孝義鎮由渡而西沿渭有魏家莊呂家莊北有侯坊渡又西有小漲村村北有蒼渡又西河漲堡大漲村有關帝廟由村而南麥王村三張村南至分界橋西與渭南接壤

道路

自州治城拱極門 今治北門 出微北至驛路東行過太平橋 水自太白峪出北入渭舊志謂州西有武平城東有告平城橋居二城之間因名太平云 至羅紋橋十里 水自潭峪小數峪出北入渭明萬曆中郡人王公撰脩橋碑記云水旋轉如羅紋故名 又東過蓮花池 水受白崖諸山之水至柳子鎮 唐時有柳懷素善楷後人思之因名 東分界碑十八里迤東則接華陰界矣

自州治城鎮乾門 今治西北門 出微北至驛路西行過小石橋西溪諸水至石堤橋十里 水至石堤峪北流入渭 又西十五里至遇仙河 水自喬峪北流入渭宋陳希夷入華山曾於此過後人思之故名 又西五里至赤水橋之分界碑 初志載周處斬蛟以赤此水即山海經之瀘水水經注之小赤水也 迤西則接渭南東界矣

自州治城南門出西南微行至石堤峪口十五里入峪十里至東岐溝又南十里至灰池又六里至千崖岔又七里至棗天石又十里至董家坪秦嶺底渡嶺十五里至吳宮臺又五里至黑龍潭峽又五里至青岡坪又南十里至羽坪又南十里至五勝溝則接雒南界矣



自州治城拱極門出北行十里至王村舖又北五里至王立渡過渭則接大荔之西南界渭南之東界矣

自州治城延春門今東南門出東南行十五里至甯山寺宋元祐中少華小敷峪內山摧故建此以鎮之又東南十里至構峪口自峪口東行至方山八里則與華陰西南接境自構峪口入南行二十里至乾喜舖又二十里至構嶺又二十五里至下陽川又南十五里至秦嶺渡嶺行四十里至白樺嶺即土人名金堆城者西南十五里通青岡坪迤南則接商維界矣

自州治城南門向西南行十里至沙澗又西南十里至瓜坡又十里至太平寺又十里至喬峪口即山海經之符禺之水水經注之招水也唐開元時詔引喬峪水為利俗渠入峪七里至崔家店十里至張雁口十三里至光石坂二十里至黨家店又二十五里至孔家店又南三十里至三岔坪又南渡秦嶺二十里至青岡坪又二十里至五勝溝則接維南西北界矣

自州治城鎮乾門出西北行十里至紙坊橋又西北十里至新莊又西北十五里

過小漲鎮至倉頭渡渡渭則接渭南境矣

自州治城拱極門出東北行二十里至王宿鎮古傳周太子宜曰廢奔會宿于此因名又東五里至拾村周宣王封其母弟友于拾是為古鄭始封地又東北五里至渭河則接華陰界矣

山

州境以南一望皆山昔人所謂西嶽之支派太華之餘氣也其山自相聯屬西與終南太白相連而層巒迭嶂要各有命名之微意焉小山不載姑記其大者以便觀覽

州東南十一里為少華山山海經太華山西八十里曰小華山註即少華山通鑑宋神宗熙甯五年少華山崩文彥博有傷國體歛民怒致華嶽山崩之說則崩者猶是少華也以今考之其崩者為阜頭峰西南與少華山連尚有遺址曰半截山少華山神唐封佑順侯阜頭峰神宋封顯應侯少華山以東為小敷峪其山曰凝山山下有靜山堂其旁浮屠以鎮山蓋宋時山摧為警也又東為彌虎峪其山曰蟠龍山或曰潛龍山兩山環列甲於諸山其中峰有藏龍寺



又東爲白崖峪又東爲構峪山曰構嶺又東曰獻峪山曰鳳居山接秦嶺南來之脉突立一峰左右兩山若舒翼然其山柏樹蒼鬱遠眺於數十里之外或曰鳳谷山亦曰鳳骨山又東爲小峪山曰三甲山此山以東爲方山則入華陰界矣  
州正南八里曰鄭南峰以後周所移鄭縣在北又西爲太平峪山曰飛來峰其峪曰太平峪有五眼泉一名海眼泉引細流入於城內泮池泉之側稱洞巖土人塑韓湘子象於洞中數禱雨有驗又西爲小溝山曰五龍山山巖有風穴風來能殺穀稼土人祀壓之其山有五脊聚於一峰故曰五龍山上樹木繁多樵蘇者不敢妄取自此山勢稍南其西曰石堤峪山曰栲栳山又西爲赤堤峪山曰馬嶺山按水經注泚水出馬嶺山昔王敬美督學關中過華州南何山諸生成以五龍對王曰非也少華以西悉太華支山也惟有馬嶺一山耳俗名馬家峪又西爲短嶺又西爲馬家峪山曰佛鉢山又西爲金堆峪又西爲喬峪亦曰招峪其西之山曰棋盤山峪內有三岔坪揮劍石其下曰千頃漫龍王嘴東有黑龍泉西有白龍泉其南之山曰符禺山即山海經所云符禺之山招水出焉水經注所云灌水北流與招水相得明一統志謂其水爲

利俗渠者也又西曰李峪山曰蘊空山山之麓有交龍寺取兩水交合而名之也又西曰東澗峪其山曰石脆山即山海經所載石脆之山灌水出焉而北流注於符禺之水者也又西曰西澗峪東禺峪西禺峪山曰英山即山海經所云英山禺水出焉北流注於招水者也又西曰黃錄溝山曰寶華山亦曰機支山又西曰竹峪即山海經所云竹水之大赤水也通志云大赤水即竹水一名箭谷水以其陽多箭籟後取以爲箭峪之名西接渭南縣界

水道

州境之水以渭水爲經流而南山各峪之水注焉然各水亦自有支流故一一詳列於後

渭水由西北界碩鳳堡入境折而東北經大漲小漲侯坊襄聖襄義平定通渭臨渭拾村等里直東至梁村北入華陰縣界按渭水變遷無常沿河居民房屋墳墓累被沖陷間有淤出河北之地而沙灘不毛難施耕作人多苦之  
赤水河在州西界三十里俗傳晉周處斬蛟於南原以赤此水故名曰赤水按此



水有九源在渭南者四在華州者五至聖山川西合流北經赤水橋又北六里入渭其在渭南者州西南五十里曰箭峪嶺即山海經所云竹山之大赤水 按通志云大赤水即竹水一名箭谷水又名清水河金史地理志云華州鄭縣赤水鎮九域志亦有赤水鎮 東北流經江村鎮西受葫蘆峪黑掌峪羊峪諸水合流至聖山會澗水其在州境者一東牛峪水在州西南四十五里龍耳山之東一西牛峪水在龍耳山之西水從山腰浸出經東巨村注大赤水西連寶華山黃錄溝水注焉一東西澗峪水二峪水各從秦嶺發源北流七十里出峪至棗園村東受處仁溝水至梁家坡西受霸王溝水至聖山會大赤水一曰李峪水在澗峪東五里蘊空山谷發源西北流至高塘鎮注澗水又東受楸花溝白崖溝之水至聖山合澗水按澗即山海經灌水而牛峪之水即禹水也

赤水渠二俱由龍王廟浸出西水傍外堤而西北逕赤水鎮西小石橋東折滙東渠水東水經赤水堡西逾竹市小石橋合西水而北經梁家灣至三漲村南仍入赤水河

遇仙西渠二俱由坡頭浸出一自坡頭北直西折北經花市潭逾小石橋直北折西而北至杜曲村北分流西支由北而西入赤水渠東支直北折東而北至後李村北仍入遇仙河一自坡頭傍遇仙西堤直北經雙碑堡逾小石橋至郭家村迤北仍入遇仙河

遇仙河州西二十五里其源有二一曰喬峪即山海經之符禹水一曰金堆峪水喬峪水由秦嶺發源七十里出峪口經千頃漫即利俗渠按唐地理志載開元四年詔引喬峪水為利俗渠支分溉田北流至會同坊金堆峪在喬峪東水由山腰湧出北流經佛鉢山東至瓜坡底受車府溝水折而西經車徒里亦至會同坊會喬峪水北逕遇仙橋東郭橋至後李村而東小漲村北入渭

遇仙東渠水由范家凹浸出傍遇仙東堤直北逾小石橋經新村項家等村西至馬王莊西北仍入遇仙河

石堤西渠水由北沙澗浸出傍石堤西堤直北逾小石橋經舖背後南侯坊等村西至筱村東迤北仍入石堤河



石橋河州西十里其源出秦嶺北流七十里出峪折而西至五港河西受赤堤峪馬家峪水北逕沙澗東及石堤橋紙坊橋聚仙橋沈陽橋直北入渭按此水即西石橋水也水經注西石橋水南出馬嶺山源泉上通懸流數十與華嶽同體其水北經鄭城西因水上有石橋故世以石橋名水也亦曰新鄭水

石堤東渠水由驛路北浸出傍石堤東堤直北逾紙坊聚仙二小石橋至河西彼村對岸仍入石堤河

西溪水州西六里其源爲石堤河浸水分流溉田至故縣西沙澗東則萬壑風煙雅堪遊眺前人慕杜子美之風遂名之曰小曲江北流經踏泥橋二郎廟至太平村東北入渭

晉公渠水一名北溪水由馬嶺山麓醮紙峪發源經張宋村至故縣東受地泉浸水又經李家莊逾西關外晉公橋直東折北又東而北穿黃家河經羅家村北東北入太平河

太平河州東郊其源出太平峪五眼泉北流經城南其地竹園甚多所謂州之南

溪水引注泮池者也其河道在城東西寨堡右北經太平橋折而西近老城東北隅北至羅家村受晉公水東北流車家堡東北流入渭太平橋即大雲橋唐時在城內時家渠水由冰龍南寨等堡側受羅紋浸水經時家廟汀村東北至周凝村北仍入羅紋

羅紋河州東十里其源出小敷峪秦嶺下七十里出峪折而西受少華峪麻峪白石峪白龍潭水兒峪諸水北逕羅紋鎮橋及安家橋吳家橋直北入渭按羅紋橋郡志謂其水波旋轉如羅紋故名

沙石渠水由白家河村西受羅紋浸水經水莊堡東逕小石橋斜向東北入埝河疏水河州東北二十五里有兩源西曰埝河東曰黃家河二河至西柳鎮正北合流東至駱駝項折而北經五達橋拾村橋通達橋北流入渭其西源出小敷峪東各山澗浸水由羅紋橋東涓涓細流至馬村東爲埝河東經武城北至西柳鎮北黃家河自南來會之按此水即東溪也官道南水田之利不亞西溪其東源一出彌虎峪北流葶蓮花池一出白崖峪北流注移山潭西受西柿溝暴雨溝水合流



而北經劉家潭一支分注蓮花池正渠北流為黃家河北匯埕河

構峪河州東二十二里其源出構嶺四十里出峪北逕迎仙橋又北折而直東逾

廣潤西橋東北斜至老河底入華陰方山河北經孫莊良村二橋入渭

廣潤渠水由鳳居山麓眾泉湧出逾小石橋經羊眼圈東北老對口入華陰方山

河

古蹟

興德宮 州北五里今日唐村唐昭宗為朱全忠請遷都洛陽館於是宮

棲雲樓 古名昭慶院唐昭宗幸華州時之行宮今州署大堂即其地

神臺宮 隋曰普德宮州西南五里遺址尚存

向陽宮 南澗峪

遊春亭 此亭不知創於何代以杜子美謫華州司功時常遊於此後人思之稱其地曰杜基立祠祀之

在州西溪之津

孝感泉 在州東少華山之麓其水極清相傳郡舉人張之榘有孝行適其地出泉故名

伏氣岡 州東十五里

下石灘 州東十二里稻畦夾于通衢古今人有五里香之稱

宰相坡 唐裴晉公吳元濟常駐車于此後人立祠祀之

試劍石 州西南澗峪相傳漢光武試劍於此

馬跑泉 州西南理寺村相傳光武飲馬處

西溪觀 唐書光化元年六月昭宗幸西溪觀競渡

廣通倉趾 隋文帝以長安倉廩虛詔以水次十三州募丁運米於華州置倉以給長安在州東北十三

里

龍泉井 在蟠龍南嶺深二尺許極旱不涸

白崖湖 即移山潭周迴百畝極旱不涸

鳳居山 漢辛綰隱居於此光武徵之不起有大鳥高五尺鷄頭燕頰蛇頸魚尾五色備具而多青棲繡

槐樹旬時不去太守以聞帝問百僚咸以鳳對太史令蔡衡曰多赤色者為鳳多青色者為鸞此鳥多

青乃鸞也上善其善三公聞之遜位辟繡終不起後人因以名山又通志載開元間鳳逐二龍至此龍



墜地化青泉二道風憤而死僧以石函其骨于此頂疊塔覆之故曰鳳骨塔明景泰間石函露啟視之鳳脛骨二尺股骨一尺五寸其色如玉今俗名曰鳳骨

倒獸山 州西南原相傳周處射殺白額虎於此

仰天池 有三一在太平峪山頂其二在龍耳山西嶺碧頃滄泓深不可測

金沙灘 州西赤水鎮南漲村即其地

高平亭 晉書愍帝建興三年河間王顥頓于鄭縣之高平亭為東軍聲援在州東柳子鎮南

武城 周顯王二十六年秦城武城在今時村距州城十五里

彤 顯王十一年秦與魏會於此即今之彤村距城二十里

械林 靈王十三年晉師諸侯大夫敗秦於此

告平城 水經注渭水又東敷水注之其水南出敷谷北逕告平城東相傳武王伐商告太平於此故城

得厥名在今柳子鎮南隔

長城 魏築長城自鄭濱洛在今武城北

周關 晉周處建按處為晉將曾征齊萬年之亂今赤水有故祠

沈陽縣址 水經注石橋水又北經沈陽縣北考其地當在侯坊以北

市鎮

赤水鎮 俗傳周處斬蛟以赤此水按山海經有大赤水又晉書載符健遂進兵攻赤水則赤水之名其

來已遠蓋因其水中有流赭而名之也流赭水中赤土之流者

羅紋鎮 郡志謂其水波旋轉如羅紋故名又記歐汪氏寓居莊戶硯工家夜有光起於支床之石異而

取之作爲硯石色碧細如羅紋中含金星

柳子鎮 唐光化二年柳懷素為將仕郎守右拾遺曾書城隍廟碑後人以其善楷法思之故名

下廟鎮 州北十里其地有西嶽廟因在華山之下故名

王宿鎮 州東北二十里周太子宜臼廢奔居宿於此故名後即位賜其庶子為宜氏

侯坊鎮 唐於渭濱同華置八坊以養馬地近渭河或以此而名與

瓜坡鎮 古瓜田之地也

高塘鎮

大明寺



江村鎮

大漲鎮 廣韻漲水大貌以其近渭故名

拾村 史記鄭世家註系本云桓公居榭林徒拾在州東北三十里

鄉屬表

鄉屬	道路	古蹟	學堂
將相鄉 轄十二里	州東十五里	告平城 郭汾陽王故里 道旁有蓮花寺	
將相里	州東十八里	漢紀公寺鳳塔	
柳子里	州東北二十五里	王宿莊宜家村	
廣潤里	州東北三十里	古拾	
孟村里	州東北二十五里		
拾村里	州東北二十五里		
臨渭里			

通渭里	州東北二十五里		
六坊里	州東北十五里		
羅紋里	州東十里		
通化里	州東八里	懷德寺	
少華里	州東南五里	山麓有甘露寺	
孝弟鄉 轄十里			
孝弟里	州西十二里		
新莊里	州西北十五里		
侯坊里	州西北十五里		
大漲里	州西北三十里		
小漲里	州西北二十五里		
平定里	州北十里		



嶽前里	州北十里	下廟鎮西有西嶽廟
褒義里	州北七里	宋寇萊公故里萊公橋
褒聖里	州北十里	道旁有河濱神廟
唐村里	州北五里	
仁義鄉		
轄十里		
興仁里	州西南三里	
興義里	州南三里	
新興里	州西南五里	有五龍寺
西溪里	州西五里	其南阜有杜子美祠
故縣里	州西南十五里	
太甯里	州東三里	東關有汾陽王祠
清甯里	州西南五十五里	

西關里	西郊	鄭桓公宋寇萊公明 姬忠烈公各有祠
甘泉里	附郭	
集賢里	州西南五十里	
豐原鄉		
轄十里		
豐原里	州西南五十里	
廣秀里	州西南六十五里	
太平里	州西南三十里	有大明寺
白泉里	州西南四十五里	
呂聖里	州西南三十里	
東能里	州西南二十五里	
良侯里	州西南十三里	有商山廟祀漢四皓
車徒里	州西南二十五里	南阜有車徒寺



遇仙里 州西二十五里

官道旁有遇仙觀

郭市里 州西二十五里

東方朔祠在會同坊

物產

昔太史公之述貨殖自連錫鐵冶畜牧樹藝五穀果實竹木絲漆魚蔬韭薑播之  
摻之悉之復之僕數而不厭豈直所謂重勢利者豔稱之耶人生不能無欲必資  
物以爲養者也資豐者饒資鮮者貧無資者無理積蓄生愚積愚生弱此亦生計  
界之公例矣華之爲州自上世以爲沃野原隰昫昫北瀕於渭畝鍾之田東西接  
畛南跨秦嶺連山百餘里五金之礦在前代固嘗發現矣山海經云符禺之山其  
陽多銅其陰多鐵脆石之山其陽多瑇瑁之玉其陰多銅英山其陰多鐵其陽多  
赤金皆在今州境少華山以西柳子鎮製造刀劍剪斧過客爭事購索轉相贈遺  
東關之方紗西關之鍼皆以精美聞於時而虎豹狐貉之皮千頃漫之魚獵人漁  
戶習以爲贏利備載前志今則物力稍稍狹矣重以地處縮穀冠蓋填咽負販轉  
移力逸於南畝習染於見聞耽惰逸而嗜飲食相師成俗都無遠慮故自髮鬻救

平歲逾三紀元氣蕭然未復抑亦地有遺利人力之不至研究之術書贖而不知  
講也謹具此方特產與夫通常所有而獨居多數者悉著於篇其志所載亦間及  
之庶盈絀之數可得而稽焉

礦物產有金有銀有錫有銅有鐵前漢書地理志鄭縣有鐵官州舊志云郡之南  
山川麓立數百墟場以煉銀砂錫砂銅砂地名下陽川南去秦嶺十五里也又秦  
嶺南有地名金堆城產金砂太平峪內產銀砂在州南距城十餘里崩崖險仄礦  
洞今尙存也瓚續志云杜工部有憶鄭南瓚詩瓚玉色石似玉也可作礎砌花盎  
之屬山海經脆石之山其陽多瑇瑁之玉即此物也

動物產續志云唐人養馬亦於涇渭近及同華置八坊今人家常畜多馬是其遺  
風矣

蠶鬻以西鄉爲多而傳授無資獲利不廣去歲成昌蒞華見天時地氣雅與南中  
相近因就舊日少華書院餘房設蠶學館招徒學習蠶師二人聘自浙江餘杭縣  
蠶子亦自餘杭帶來者及蠶事告竣剝繭抽絲堅韌光澤實與浙產無異此後倫



能實力推廣則大利之興當可拭目俟之矣

羽屬若鶴若鳧若鷓若鷓若竹鷄若葦鳥渭以北罕見之然南山一帶視爲常有魚則有鱧有鱖有鯉有鱖有鱖而俗不以爲常具之食品介則有鱖有蚌有龜所謂金錢龜也

植物產以農產物爲最貴品農產物又以穀類爲最貴品州境憑山高仰之田宜菽宜玉麥宜黍宜稷宜芋原隰宜稻宜麥宜秫宜粱就大較言之當可爲穀類之出產場然而通計歲入則藍棉煙草之利視五穀值厚矣罌粟之利視藍棉煙草尤厚穀賤病農濟以妖卉飲酖而甘不其唏矣又若卮茜之饒昔人豔其利等於千戶侯州志所謂紅花是也自西品顏料輸入銷場被奪無復種者亦足驗世變也

蔬菜以泥河爲最美曾見於前志實則瀕渭下田沮洳浸漑之便無地不宜蔬凡蔬之類無一不備最著者竹萌藕山藥亦上品也果若核桃若栗若棗若柿若萬壽果皆大宗而桃杏尤多近山沙礫之田東西數十里皆桃杏林也方春花時采

霞穠郁彌望無際致爲佳勝

嶺山東西峪口多竹園總計之可二千畝有斑紋者爲貴木則多桑多栗多楮多構多柏多檜多椴多松多櫟多漆多桐至若楊檉榆數家之聚接蔭鬱然亦屋材大宗也

藥類無慮數十種防風蒼朮麻黃多采掘者本草云欵冬花出雍州南山及華州最有名矣

製造產有絲有蜜白者佳蜂房往往見山厓閒有漆汁有漆子油漆子油製燭與蠟等土人所謂漆蠟也有竹製物有構紙有火紙有葦席皆大宗見於舊志者若侯坊之鞣器王宿莊柳子鎮之布土波寨之黑綠韋嘗著聞矣石隄峪引水推機屑雜木作香料汾溪數十里輪轉軸旋鳴聲互答亦山區優利也

商務

州境西距長安不二百里東望華河密邇晉豫南通商維擅材木之饒北帶渭得



運輸之便交易四達宜乎爲居積逐時者之所走集矣而輸出之品獨竹製器物爲大宗繭絲錠棉葦席火紙運銷不出百數十里果若桃乾杏乾桃杏仁柿餅萬壽果藥若麻黃防風蒼朮蔬若笋藕山藥東輸至華陰西輸至西安三原止矣而雅片一宗遠及山西河南直隸山東每歲以鉅萬計其輸入品則煤鐵之舟汎於河渭來自山西洋布洋紗巾扇鈕扣綢貨來自西安粟來自渭北然獨粟爲至多矣約計之歲可四五百萬石大率以鴉片輾轉相買然則華之民仰食於鴉片者殆十室而五六此甯可長恃乎蓋聞英人之治印度歲用所資取之鴉片而大足而顧慮吾之禁之急急於植茶藝棉豫爲抵補碧目白膚之族胡乃善爲遠計如是也毋曰匪害後憂方大嗟我華民尙念之哉尙備之哉



終